

YONI 'INA E'ITA'ITA YESU 'ENEGA

Yoni tauna Yesu tetelina manuna 'iguiguinuwa, 'enega 'ana talauwalao si'au'ewena ga sisa'una salu 'ana esana Patimo 'enaya, ga nada Sabateya 'isidasida Yaluyaluwa Tabuna 'ina waiwaiyega, ga Yesu mwalatoi Yaubada 'enega 'ie'itenya yage nidi ma'etamo sida apwesa bale'uya manudi. 'Enega Yesu 'ie'ita 'ina anilose 'ena ga tauna 'iemwasala balena Yoni 'enaya, ga Yoni 'i'etoladidi buki gete solanaya.

'Ebe e'ale

1 ¹Buki gete 'enaya Yesu Keliso 'ina e'ita tetelina, Yaubada 'i'ebwa'ena be 'aene Yesu 'ida e'itae 'ina toguinuwao 'ediya be sida mwalatoni to'ase 'iabe 'iapwesama.

Gete e'ita nina Yesu Keliso 'ina anilose 'ietunena, be 'ina 'ali'ei Yoni 'enaya 'ida simana. ²'Enega Yoni yage nidi ni'atu 'i'itedi maibo'adi, ga 'isimana apwesena, nate Yaubada 'ina ona, ta wate Yesu Keliso tetelina.

³ Wada gwausowala 'oyo tosawa be 'omi toenonoyao, 'abo ona getedi wanonodi be wamuliyedi, manuna yage nidi 'isimanedi 'iabe siapwesa.

⁴ ^a'Abo'agu Yoni 'imi leta ya'etoladinawa ekalesiyao 'ami yau sebeni Esia solanaya. Oboboma be nuwasiwalo 'emiya, Yaubada 'enega, be yaluyaluwa sebeni 'ediyega, ta Yesu Keliso 'enega. Tauna Yaubada nina lowaenei ga batuwa ta tuta simeemai 'ediya 'imiyami, ta yaluyaluwa nidi sebeni taudi Yaubada 'ina 'ebemi esaesa matanaya simiyami.

⁵ Ta Yesu Keliso tauna Tosimana 'ai'aila, ta wate tauna mwawasesga 'igimi toololimana, ta bale'u 'ana tolinoao 'idi kini. Tauna Yesu nina 'iobobomeda ga 'ida loegesiyao lalanega 'i'utu yauledi. ⁶ 'Enega 'iegogoneda be 'aene 'abo'ada 'ina tolinoao be 'ina totaliyao Tamana Yaubada 'enaya. Tauna Yesu nina 'ina esaesa be 'ina waiwai miyamiya atayadi. Eimeni.

^a 1:4-6 Et 4:5, 17:14; Kol 1:17-18; 1 Yo 1:7; 1 Pi 2:9; Et 20:6

^{7^b}Ta wa'ita tauna ma'etamo galewega 'imwa'utama pwana 'enega, be tomota yauyaudi be wate lowa 'ana tobadiyao maibo'adi sida 'ita, be 'enega tomiya bale'u sena maibo'adi 'ediyia sida nuwamwau be matanaya sida dedoi. Nadigega. Eimeni.

⁸'Ida 'Inapwana 'igwae, "Abo'agu 'ebe e'ale be 'ebe losalowa." Tauna Yaubada nina Toewaiwai sana, ta lowaenei ga batuwa ta tutu simeemai 'ediyia 'imiyami.

Keliso 'ana 'ita

⁹'Abo'agu tasimiya Yoni. Ni'atu taeboda 'ebweuna Yesu ma'edai, ta 'ina 'ebeloina solanaya 'omi be 'abo'agu tae'alama'i'itaneda 'elouya be mawaii 'ediyia. 'Abo'agu lowa yoniyonigu salu Patimo 'ena, manuna yaloguguya Yaubada 'ina ona be Yesu tetelina.

¹⁰Gote 'ena 'ebweu 'ida 'Inapwana 'ina 'asiyata 'enaya Yaluyaluwa Tabuna 'eguya yalotoona, ta 'enega 'ebweu 'enana sinabwana yanonona 'atuwa nadigega yoguli 'ionaona gwauguya, 'igwaegwae, ¹¹"Yage nidi ma'etamo 'u'itadi manudi 'uda 'etoladidi, be 'enega buki nina 'uda etune Ekalesiyao sebeni 'ediyia, nate Epeso be Simulina be Peligamo be Tayatala be Salidisa be Piladelipia be Laodisia wate 'enaya."

¹²'Enega yatoolo sakowasi be 'aene yada 'ita yaita tauna 'eguya 'ionaona. Gote 'ena mayale sebeni ya'itedi, goula 'ediyega siguinuwedi. ^{13^c}Ta gamwagamwanidiya 'ebweu tai ya'iteni, 'ana 'ita 'atuwa tomota, 'ana 'oama 'aalanega ga 'aenaya, ta lumalumana 'ana diyawpata goula, ^{14^d}ta 'uya'uyana wakewakeke wawasae, nadigega yaguma auwauna, ta matana 'atuwa nadigega kaiwe sabesabeluluna 'adi 'ita. ¹⁵Ta 'aena namanamalidi 'atuwa nadigega kainumu auwauna sigabuna, ta 'enana 'ana nono 'atuwa nadigega bwasi sinabwadi sidaudau, ^{16^e}ta wate kwadima sebeni 'atainega 'igilagasidi, ta wate 'awanega sisaisiya mamata sena luwaluwana 'iapweapwesa, ta maninina 'atuwa sinala 'ina sae 'asuoleoley.

¹⁷Ya'iteni ga 'aenaya yabe'u 'atuwa nadigega yamwawasa. 'Enega nima 'ataina 'eguya 'isa'una, ga 'iona, "Geya'abo 'umamatatauta, manuna 'abo'agu 'ebe e'ale be 'ebe losalowa, ¹⁸mayawasigu yamiyami. Ta lowa yamwawasa, ta 'u'ita 'abo'agu yamiyami, ta geya'abo yagumwagumwala. 'Abo'agu wate nimaguya Mwawasa be tomwawasa yaluyaluwadi 'idi sena 'adi 'ebe gigeye yagiyaidi.

¹⁹"Bobo'ana. Yage getedi 'u'itediya 'u'etoladidi, nate 'ebe'ita gete tuga manuna, ta tutu simeemai manudi.

²⁰"Gete kwadima nidi sebeni 'ataiguya 'u'itediya, be wate mayale nidi sebeni 'u'itediya, 'adi mwalatoi kwaikwaiyidi 'emuya, 'enega 'emuya yada

^b 1:7 Md 24:30; Yo 19:34, 37; Gu 1:11 ^c 1:13-15 Dan 7:13-14, 10:6 ^d 1:14-15 Et 2:18

^e 1:16 Ib 4:12; Et 19:15, 21

li'amidi. Kwadima nidi sebeni nate aniloseyao sebeni, ekalesiyao nidi sebeni manudi, ta mayale nidi sebeni nate taudi ekalesiyao nidi sebeni.”

Me Epeso 'idi leta

2 ¹Anilose nina totapwaloloyao Epeso 'ena 'i'ita'ita'i'isidi 'ina leta 'uda 'etoladi me Epeso nidi manudi, be 'uda gwae: Ale gete 'imai tauna kwadima nidi sebeni nima 'atainega 'igiyaidi, ta mayale goula sebeni nidi gamwagamwanidiya 'itautauya 'enega. Tauna gete 'ina simana 'emiya, 'igwae:

²^f“Ni'atu yamwalatonimi, 'aene 'imi paisewa sinabwana 'enega, be 'imi e'alama'i'itana 'ediyega, waewaiwai, ta toto'umalidi geya nuwami, 'enega 'agu tosimana kabokaboyao watoodi ga 'idi kabo wagieapwesena.

³ Ta wate 'alama'i'ita wamwalamwalatoni, 'enega guinuwa mwaudi ta sinabwadi 'ediyega nigeya waneeneta, 'agu esana manuna.

⁴“Ta 'abo'agu 'ebweu yage 'emiya ya'iteni nigeya bobo'ana, nate lowa 'imi oboboma nina 'eguya ni'atu walosa'un. ⁵^gLowa bobo'ami, ta wada nuwa'i'isi mane 'enega wabe'u, 'enega wada nuwa'ebuni limana be wada guinuwa bobo'ana, nadigega lowa. Ta 'abo sa'i geya'abo wanuwanuwa'ebuni, 'emiya yawawai be 'imi mayale 'emiyega ya'ewayaule.

⁶“Ta yamwalatonimi 'aene 'ebweu yage bobo'ana 'emiya, nate Nikoleitanio 'idi bubuna waguitoyasena, 'abo'agu wate nadigega.

⁷^h“Enega 'abo yaita 'omi matenana 'ida nono Yaluyaluwa Tabuna 'ina ona toekalesiyao 'ediya.

“Ta 'abo 'omi yaita 'iewaiwai, 'enaya yawasida 'ana kaiwe uwana yatagwale be 'ida 'ani, kaiwe nina 'itoootoolo Yaubada 'ina bagulaya.”

Me Simulina 'idi leta

⁸Anilose nina totapwaloloyao Simulina 'ena 'i'ita'ita'i'isidi 'ina leta 'uda 'etoladi me Simulina nidi manudi be 'uda gwae: Ale gete 'imai tauna 'ebe e'ale be 'ebe losalowa 'enega, tauna ni'atu 'imwawasa ta 'itoolo limana ga mayawasina 'imiyami. Tauna gete 'ina simana 'emiya 'igwae:

⁹ⁱ“Ni'atu yamwalatonina 'imi 'elouyao, nate 'omi gomagomabesomi, ta esi wada nuwa'i'isi 'aene 'omi ma imi esaesa, ta wate ni'atu yamwalamwalatoni 'aene 'aidi Seitani 'ina bodao si'awa'awa to'umaliyemi, ta wate sigwae, ‘Abo'ama me Yudia,’ ta nigeya. Taudi esiya tuga Seitani 'ina bodao. ¹⁰^jTa geya'abo wamatamatauta 'abo to yage 'ena 'elouya waloba. Wada nuwa'i'isi 'aene 'etamo Seitani 'ida wasegigiyemi be 'aimi sida yonimi be deliya sida sa'umi, ta esi 'ami mwau nidi 'asiyata sanau dimo manudi.

^f 2:2 1 Yo 4:1; 2 Yo 7:11 ^g 2:5 Et 3:3 ^h 2:7 Et 22:1-2, 14 ⁱ 2:9 2 Ko 11:13-15

^j 2:10 2 Ti 4:8; Ye 1:12; 1 Pi 3:14; Lu 22:31-32

"Ta wada toolopa'ala 'ana laba mwawasa, be 'enega yawasimi ataya yada 'ebwa'emi.

11^k"Enega 'abo yaita 'omi matenana, Yaluyaluwa Tabuna 'ina ona toekalesiyao 'ediya 'ida nono. Ta wate 'abo 'omi yaisigedi Seitani waewaiwai sinena, geya'abo sa'i mwawasa 'eluwena 'igegie to'umaliyemi."

Me Peligamo 'idi leta

12^lAnilose nina totapwaloloyao Peligamo 'ena 'i'ita'ita'i'isidi 'ina leta 'uda 'etoladi me Peligamo nidi manudi, be 'uda gwae: Ale gete 'imai tauna ma ina sisisiai mamata sena luwaluwana 'enega. Tauna gete 'ina simana 'emiya, 'igwae:

13 "Ni'atu yamwalamwalatoni sena nina 'ena wamiyami, nate Seitani 'ina 'ebeloina. Ta tuwa tuga waemisa 'ai'ailigu, manuna nigeya wada eyaseyaseyegu. Ta Seitani 'ina sena nina 'ena lowa 'ebweu 'agu tosimana 'ai'aila siloemwawasina, 'ana esana Anitipasa, ta tuga sa'i wagiyaigu pa'alina.

14^m"Ta esi 'imi bubuna 'aina manudi nigeya yagwaugwausowala, manuna 'aimi Balami 'ina e'itao wamulimulyedi, ta 'ina e'itao nidi lowa Balaki 'imulyedi ga me Isileli bubuna to'umalina 'ie'itedi, nate tokwalui siemisena ga 'ana masula si'ebwa'ena, ta to'ebwaya nidi masula nina sie'ani, be wate siloelata.

15 "Ta wate 'ebweu yage nigeya bobo'ana, nate 'aimi Nikoleitanio 'idi e'ita wamulimulyedi. 16ⁿ"Enega gete tuga bubuna to'umalidi nidi 'ediyega wada nuwa'ebuni. Ta 'abo nigeya, tuta gidalina 'ena yawayai be yada losaiyemi, sisisiai nina 'awaguyega 'iapweapwesa 'enega.

17^o"Enega 'abo 'omi yaita matenana, Yaluyaluwa Tabuna 'ina ona toekalesiyao 'ediya 'ida nono.

"Ta 'abo yaisigedi 'omi Seitani waewaiwai sinena, masula kwaikwaiyina yada 'ebwa'emi. Ta wate 'ebweuna 'ebweuna 'enaya yada eguyai gulewa wakewakekedu, ta gulewa nidi 'ediya 'ami esanao auwaudi simiyami, nate nigeya 'ebweu yaita sawesawenaya be 'imwalatonidi, nate namo taudi to'ewa nidi simwalamwalatoni."

Me Tayataila 'idi leta

18^pAnilose nina totapwaloloyao Tayataila 'ena 'i'ita'ita'i'isidi 'ina leta 'uda 'etoladi me Tayataila nidi manudi, be 'uda gwae: Ale gete 'imai Yaubada Natuna 'enega, tauna matana 'adi 'ita 'atuwa nadigega kaiwe sabesabeluluna, ta wate 'aena namanamalidi 'atuwa kainumu auwauna sigabuna.

^k 2:11 Et 20:14, 21:8 ^l 2:12 Ib 4:12 ^m 2:14 Num 25:1-9, 31:16 ⁿ 2:16 Et 19:15, 22:12
^o 2:17 Et 3:12 ^p 2:18 Et 1:14-15

¹⁹Tauna gete 'ina simana 'emiya, 'igwae, "Imi guinuwao ni'atu yamwalamwalatonidi, 'imi oboboma be 'imi emisa be 'imi paisewa be 'imi 'alama'i'ita, ta yamwalatonimi 'aene gete tuga 'imi guinuwao bobo'ana wawasae, ta lowa tupwana.

²⁰"Ta esi gete 'ena 'ebweu yage manuna nigeya yagwaugausowala, manuna Yesibeli 'ena watagwala, tauna waine nina 'ieesena 'aene 'ebweu Yaubada 'ana tosimana, ta nigeya. Manuna waine nina esi 'igu toguinuwao loyaweyega ta wate tokwalui 'ediyega 'ilisidi, manuna tokwalui siemisena, ga 'ana masula si'ebwa'ena, ga to'ebwaya nidi sie'enina. ²¹Ta ni'atu waine nina 'ina tutu ya'ebwa'ena be 'aene 'ina to'umalina nidi 'ediyega 'ida nuwa'ebuni, ta sa'i geya nuwana be 'ina loyawe nina 'ida guityoyase. ²²'Enega le'oasa yada 'ebwa'e, be 'abo yaisigedi taudi ma'enao siloyawe 'elouya sinabwana sida loba, 'abo 'idi guinuwa to'umalidi 'ediyega nigeya sinuwanuwa'ebuni. ²³Ta wate natunao yada loemwawasidi, be 'enega ekalesiyao maibo'adi sida mwalatonigu 'aene 'abo'agu tomota yauyaudi 'idi nuwanuwa 'atediya maibo'ana yamwalamwalatoni, ta wate maibo'ami 'emiya yada e'isa to'ase nadigega 'imi guinuwao, nai bobo'adi, nai to'umalina.

²⁴"Ta 'omi Me Tayataila nimi, 'abo bubuna to'umalidi getedi nigeya wamulimulyedi, nai Seitani 'ina e'itao ni'uni'udi nigeya wamwalamwalatonidi, geya'abo wate 'aa'aala mwauna ya'ebwa'ebwa'emi. ²⁵Tuga ma imi emisa wada toolopa'ala 'ana laba yailama.

²⁶⁻²⁷^q"Ta wate 'abo yaisigedi 'omi Seitani waewaiwai sinena, be 'igu guinuwa nina tuga waguiguinuwei be 'ana laba 'ebe losalowa 'ena, loina yada 'ebwa'emi be sena yauyaudi wada loinedi. Nadigega tuga Tamagu loina 'i'ebwa'eguya. Ta 'imi loina nina waiwaina 'enega wada loina tomota 'ediyia, 'atuwa nadigega kainumuyega 'ulena ta'aupisalidi. ²⁸Ta wate 'ubwana yada 'ebwa'emi.

²⁹"'Enega 'abo 'omi yaita matenana, Yaluyaluwa Tabuna 'ina ona ekalesiyao 'ediyia 'ida nono."

Me Salidisa 'idi leta

3 ¹Anilose nina totapwaloloyao Salidisa 'ena 'i'ita'ita'i'isidi 'ina leta 'uda 'etoladi Me Salidisa nidi manudi be 'uda gwae: Ale gete 'imai tai nina 'enega, tauna tai nina Yaubada Yaluyaluwana sebeni be wate kwadima sebeni 'ena simiyami. Tauna gete 'ina simana 'emiya, 'igwae, "Imi guinuwao ni'atu yamwalamwalatonidi, ta wate tetelimi yanorononaya 'aene mayawasimi wamiyami, ta nigeya sa'i, manuna yaluyaluwami ni'atu simwawasa. ²'Enega 'eno'enoega wada toolo be to'ase gidalina 'emiya 'imiyami wada giesinabwa, ta geya'abo maibo'ana 'imwawamwawasa.

^q 2:26-28 Sam 2:8-9; Et 22:16

"Ta wate yamwalatonina 'aene 'imi guinuwao Yaubada matanaya 'aina nigeya palupaludi. ³"Ta lowa e'ita nina sie'itemiya ga wanononaya, 'enega wada nuwa'i'isi be wasanaila, ta wamuliya 'ai'aila. Ta 'abo nigeya 'eno'enoega watoottolo, 'etamo 'emiya yawawai be yalojesalutuimi nadigega to'ipwala, ta nigeya wamwalamwalatoni to tuta 'ena yawawa.

⁴"Ta 'aimi Me Salidisa ma 'ami 'oama 'esasedi, 'etamo 'omi ma'egwao tada tauya leleleya ma 'ada 'oama wakewakekena, nate 'ami lobwene.

⁵"Nadigega tuga 'abo yaisigedi 'omi waewaiwai, 'omi wate 'ami 'oama wakewakekedu wada 'otedi, be geya'abo 'ami esana yawasi bukina 'enega yakweukweu yauledi, ta esi 'ami esanao yada 'inanedi Tamagu be 'ina aniloseyao 'ediya, 'aene 'omi 'igu boda.

⁶"Enega 'abo 'omi yaita matenana, Yaluyaluwa Tabuna 'ina ona ekalesiyao 'ediya 'ida nono."

Me Piladelipia 'idi leta

⁷"Anilose nina totapwaloloyao Piladelipia 'ena 'i'ita'ita'i'isidi 'ina leta 'uda 'etoladi Me Piladelipia nidi manudi, be 'uda gwae: Ale gete 'imai tauna 'esasena ta palupaluna 'enega, ta wate tauna Debida 'ina 'ebe gigege nimanaya 'igiyagiyai, ta 'abo 'awa 'igigege nigeya 'ebweu yaita sawesawenaya be 'igibode, ta wate 'abo 'igibode geya'abo 'ebweu yaita 'igigegigege.

⁸Tauna gete 'isimana 'emiya, 'igwae, "Imi guinuwao ni'atu yamwalatonidi, ta wate yamwalamwalatoni 'aene 'imi waiwai tupwana 'imiyami, manuna 'igu e'itao wamuliyedi, ta wate 'agu esana nigeya waeyaseyaseye. Ni'atu 'awa yagigegena manumi, ta nigeya 'ebweu yaita sawesawenaya be 'ida gibode.

⁹"Ta wada enono 'ai'aila taudi Seitani 'ina bodoa manudi, manuna sikabo ga sigwae 'aene taudi me Yudia, ta nigeya sa'i. 'Enega 'etamo yaloinedi be simamai matamiya be 'emiya sida bwagobwago, be 'enega maibo'adi sida mwalatoni 'aene 'omi yaobobomemi.

¹⁰"Ta 'etamo tuta mwau 'ida apwesa bale'uya, be tomota yaudi 'ida toodi, ta 'omi esi mwau nina 'enaya yada 'ita'i'isimi, manuna 'igu ona waemamatatanena, ga manugu wae'alama'i'itanemi.

¹¹"Iabe yawawa, ta to'a se nadigega 'emiya 'imiyami wada giyai'i'isidi, be geya'abo yaita pali nina 'emiyega 'i'ewa'ewa yaule.

¹²"Ta 'abo yaita 'omi 'iewaiwai, yada loina be 'ida e'ola Yaubada 'ina Anuwa Tabu manuna, be geya'abo wate 'ipilipilisine, ta 'emiya Yaubada 'ana esana yada 'etoladi, ta wate Yaubada 'ina 'asa 'ana esana yada 'etoladi, nate Yelusalema auwauna, tauna 'etamo galewega 'ida

^r 3:3 1 Te 5:2 ^s 3:4 Yu 1:22-23; Lu 10:20 ^t 3:5 Md 10:32 ^u 3:7 Ais 22:22

^v 3:9 Ais 60:14 ^w 3:11 Ye 1:12 ^x 3:12 Et 14:1

mwa'utama 'igu Yaubada 'enega. Ta wate 'emiya 'agu esana auwauna yada 'etoladi.

¹³"Enega 'abo 'omi yaita matenana, Yaluyaluwa Tabuna 'ina ona ekalesiyao 'ediyia 'ida nono."

Me Laodisia 'idi leta

¹⁴yAnilose nina totapwaloloyao Laodisia 'ena 'i'ita'ita'i'isidi, 'ina leta 'uda 'etoladi Me Laodisia nidi manudi, be 'uda gwa: Ale gete 'imai Topalupaluna 'enega, tauna Tosimana 'ai'aila, ta wate tauna Yaubada 'ina mweluluwa 'aledi, 'ina simana 'emiya 'igwae:

¹⁵z"Imi guinuwao ni'atu yamwalatonidi 'aene nigeya yaiyai nai gonitu, ta ma igu nuwayaina 'aene 'ebweu sena 'ena wamiyami. ¹⁶Ta 'omi tuga gamwagamwanaya, nigeya yaiyai nai gonitu 'idi senaya wamiyami. 'Enega 'awaguyega 'aene yada giwala apwesemi.

¹⁷a"Ta 'omi wagwae, 'Abo'agu toesesa, ta yage yauna sawesaweguya, ta nigeya wamwalamwalatoni 'aene 'omi gomagomabesomi tuga, ta nuwa'ole'olemi sa'i, ta wate matakebokebomi be mabubugewami.

¹⁸b"Enega yaemataluwemi be 'eguyega goula 'ai'aila wada gimwane be 'enega wada eesaesa, ta wate 'oama wakewakekedu wada gimwanedi be wada 'otedi ta geya'abo mabubugewami wataautauya, ta wate mulamula wada gimwane be matamiya wada sa'udi be 'enega matami sida 'esasa.

¹⁹c"Ta wada nuwa'i'isi 'aene yaisigedi 'omi yaobobomemi, 'enapa'alega be loinega yagiepaepaluyemi. 'Enega wada ewawai be 'imi to'umalina 'enega wada nuwa'ebuni.

²⁰d"Ta wa'ita, 'abo'agu 'imi 'awa 'ena yatoottolo ta ya'au'aukeke. Ta 'abo yaita 'oyo 'enagu 'unono be 'awa 'ugigege, 'imu anuwaya yalulugu be 'abo'agu ta 'oyo taegosigosiyana, be 'oyo ma'iyagu tada 'e'ai leleleya.

²¹e"Ta 'abo yaita 'omi 'iewawai, yada tagwala 'enaya be ma'iyagu 'ada miyatowa 'igu 'ebemi esaesa 'ena, nadigega tuga 'abo'agu yaewawai, ga Tamagu 'ina 'ebemi esaesa 'ena ma'iyagu 'amiyatowa.

²²f"Enega 'abo 'omi yaita matenana Yaluyaluwa Tabuna 'ina ona ekalesiyao 'ediyia 'ida nono."

Me Galewa Yaubada 'enaya sibwagobwago

4 ¹Yage getedi ni'atu sigumwala ga yadunedune, 'enega 'ebweu 'awa ya'itena galewega l'i'egegena. Ta wate 'ebweu 'enana yanonona 'atuwa yoguli, tauna tuga lowa yanonoronaya, 'eguya 'ionaona 'igwae, "Uda tu'ema be yada e'itayo to'ase 'iabe 'iapwesa." ²gote 'ena Yaluyaluwa Tabuna 'ina waiwai yalotoona, 'enega galewaya 'ebweu

^y 3:14 Kol 1:15; Et 19:11 ^z 3:15 Lo 12:11 ^a 3:17 Lu 12:21; Ye 2:5 ^b 3:18 Ais 55:1

^c 3:19 Ib 12:7 ^d 3:20 Yo 14:23 ^e 3:21 Md 19:28 ^f 4:2 Ais 6:1

toloina ya'itena 'ina 'ebemi esaesa 'ena 'imiyatowa. ³^gTa maninina ya'itena 'inamanamala 'atuwa gulewa esaesa. Ta 'ebemi esaesa nina ulele kalakalawina 'itoolo sakowasiyena. ⁴Ta 'ebemi esaesa wate 'adi yau tuweniti powa simiya sakowasiyena, ta 'ebemiyia nidi 'ediya 'inapwanaao site tuweniti powa simiyatowa ma 'adi 'oama wakewakekedu, ta wate ma 'adi peyaula esaesa goula debadiya. ⁵Ta 'ebemi esaesa nina gamwagamwanidiya 'enega 'aina yage siapweapwesama, namala, be 'aina 'enana, ta wate wepalala. Ta wate 'ebemi esaesa nina matanaya mayale sebeni sisabesabelulu, taudi nate Yaubada yaluyaluwanaao sebeni. ⁶^hTa 'ebemi esaesa nina matanaya 'ebweu yage 'inamanamala 'atuwa siwalowa bobo'ana ola debanaya, 'ana 'ita 'atuwa gelasi nadigega.

Ta wate 'ebemi esaesa nina selabenaya yobai ata sitoolo sakowasiyena, ta bwaladi maibo'ana 'ediya matadi simiyamiya. ⁷'Ebweu yobai nina 'ana 'ita 'atuwa laiyoni, ta 'eluwena 'atuwa bulumakau, ta 'etonina maninina 'ana 'ita 'atuwa tomota, ta wate eatana 'ana 'ita 'atuwa magisubu 'itaetaeaya. ⁸ⁱTa 'ebweuna 'ebweuna papediyo 'adi yau sikisi, ta papediyo nidi maibo'adi matadi wate yauna 'atamanega ta solanega. Ta tuta maibo'ana, 'asiyata be boiboi 'ediya, siwaliwali, sigwaegwae:

“Tabu, tabu, tabu, 'Inapwana Yaubada,

Toewaiwai sana. Tauna tuta lowa, ta batuwa ta tuta simeemai 'ediya 'imiyami.”

⁹^jTomiya ataya nina 'ina 'ebemi esaesa 'enaya 'imiyatowa, ta tuta yauyauna yobai nidi getedi siwaliwali tuputupu ta si'awa'awa esaesa, ta wate silokalokagutoki 'enaya. ¹⁰Ta tuta yauyauna 'abo yobai getedi siwaliwali, 'inapwanaao site tuweniti powa nidi sibe'ube'u sanamwa'uta Tauna miyamiya atayana 'ina 'ebemi esaesa matanaya, ta sibwagobwago 'enaya. Ta 'adi peyaula goula 'ebemi esaesa matanaya sisa'u ebusiyedi, ga sigwaegwae:

¹¹“Oyo 'ima 'Inapwana ta 'ima Yaubada, 'ilobwenema be 'atupuyo ta 'a'amayabeyo, manuna 'oyo 'imu waiwaiyega yage yauyauna 'umweluluidi. Tauyo 'imu nuwenuwega 'umweluluidi, ga batuwa mayawasidi.”

Buki 'ana 'ita 'atuwa pwepwai sinunumina

5 ¹'Enega tauna 'ebemi esaesa nina 'ena 'imiyatowa ya'itena, ta nima 'atainega pwepwai sinunumina nadigega gimibuki 'igiyaina, ta 'eto'etoladina solanega ta gwaunega, ta wate pwepwai nina 'ana losipwa 'ana yau sebeni. ²Ta wate 'ebweu anilose waiwaina ya'itena, ta 'enana sinabwanega 'ibwaubwau, 'igwae, “Yaita sawesawenaya be losipwa nidi 'ida li'amidi be pwepwai 'ineyasi?”

^g 4:3 Isi 1:28 ^h 4:6 Isi 1:5-10 ⁱ 4:8 Ais 6:2-3 ^j 4:9-10 Dan 6:26

³Ta ona'ai'aila, nigeya 'ebweu yaita 'ilobaloba galewaya nai bale'uya nai bale'u 'ubuninaya 'aene tauna sawesawenaya be losipwa nidi 'ili'amidi be buki nina solana 'ida 'ita. ⁴Ga yanuwamwau 'ai'aila ga yadedoi, manuna nigeya 'ebweu yaita silobaloba 'ana lobwene be buki nina 'igigebe solana 'ida 'ita.

⁵'Enega 'inapwanao nidi 'ediyega 'ebweuna 'eguya 'igwae, "Geya'abo 'udeedo, manuna layoni nina Yudia 'enega, tauna Debida 'ina susuyega ni'atu 'iewawai, ga tauna sawesawenaya be losipwa sebeni nidi 'ili'amidi be pwepwai nina 'ida neyasi."

⁶^kTa wate 'ebemi esaesa nina selabenaya 'ebweu lami ya'iten, yobai ata gamwagamwanidiya 'itootoolo ta 'inapwanao wate gamwagamwanidiya, ta lami nina 'ana 'ita 'atuwa tauna siloemwawasina, ta kunanao sebeni ta matanao wate sebeni, taudi matanao nidi nate Yaubada yaluyaluwanao taudi 'ietunedi bale'u maibo'ana 'enaya. ⁷Ga lami nina 'inao ga pwepwai nina 'i'ewena tauna 'ebemi esaesa 'ena 'imiyami nima 'atainega.

⁸^l'Enega ni'atu pwepwai nina 'i'ewena, ga yobai nidi be wate 'inapwanao nidi lami nina 'enaya sibe'u sanamwa'uta ga 'ena sibwagobwago, ta 'ebweuna 'ebweuna 'ediy ma idi 'ebe gwanegwane siguiguinuwa, ta wate ma idi gaeba goula ta bobo'adi, ga gala'u maina bobo'ana gaeba nidi soladiya sigabuna, ta 'ana mwalatoi nate Yaubada 'ina tomotaiyao 'idi sidasida situ'etu'e 'enaya.

⁹^mGa wali auwauna siwaliyena, sigwae:

"Ona 'ai'aila, 'oyo sawesawemuya be buki nate 'u'ewa, ta wate sawesawemuya 'ana losipwa 'uli'ami, manuna ni'atu siloemwawasimu, ga lalamuyega tomota 'usa'ugagidi Yaubada manuna, ta taudi bodao be 'enanao be susuyao be 'ebeloinao maibo'adi 'ediyega. ¹⁰ⁿManuna 'oyo 'uesinuwedi be 'aene 'imu 'ebeloina solanaya sida etotaliya Yaubada manuna, be wate bale'uya sida etoloina."

¹¹^oTa wate aniloseyao yau wawasae ya'itedi, nigeya aisawa, 'ebemi esaesa nina be yobai nidi ta wate 'inapwanao nidi sitoolo sakowasiyedi, ¹²ta wate 'enadi sinabwana yanonona sigwaegwae,

"Tauna lami nina siloemwawasina, sawesawenaya be loina be esaesa be mwalatoi be waiwai be 'amayaba be tupu ta wate 'awabobo'ana 'ida lobadi."

¹³Ta wate mwelumweluluwao 'ebweuna 'ebweuna galewaya be bale'uya be bale'u 'ubuninaya be olaya, ta wate mwelumweluluwao sena maibo'adi 'ediyega, yanonodi siwaliwali, sigwaegwae:

"Tauna 'ebemi esaesa 'ena 'imiyatowa, be wate lami nina 'ediy, tada tuputupu be tada 'amayabedi be ta'awa 'ese'esedi, ta wate ta'awa toewaiwaiyedi, tutu maibo'ana 'ediy."

^k 5:6 Sak 4:10 ^l 5:8 Et 8:3-4, 15:2; Sam 141:2 ^m 5:9 Sam 98:1 ⁿ 5:10 Ais 61:6; Et 20:6, 22:5; 1 Pi 2:9 ^o 5:11 Dan 7:9-10

¹⁴'Enega yobai nidi site ata sigwae, "Nadigega," ta wate 'inapwanaao nidi sibe'u sanamwa'uta, ga sibwagobwago.

Losipwa nidi sebeni

6 ¹'Enega lami nina ya'itenan losipwa 'ebweu 'ili'amina, ga yobai nidi 'ediyega 'ebweu 'enana nadigega wepalala yanonona, 'igwae, "Umai." ²'Enega yadunedune ga 'ebweu osi wakewakekena 'iapwesama, ta 'ana togelu nina ma ina gita be tupu, ta wate 'ana peyaula esaesa si'ebwa'ena. 'Enega 'itauya ga 'ilosaiya, ta 'iewaiwai.

³'Enega lami nina losipwa 'eluwena 'ili'amina, ga wate yobai 'eluwena 'enana yanonona, 'igwae, "Umai." ⁴'Enega 'ebweu osi bwewayabweyalina 'iapwesama, ta 'ana togelu nina waiwai si'ebwa'ena be saiya 'ida me'e bale'uya, be 'enega tomota maibo'adi taudimo sida losaiya be sida eunuunuwed, ta wate sisaisaiya sinabwana si'ebwa'ena.

⁵'Enega lami nina wate losipwa 'etonina 'ili'amina, ta wate yobai 'etonina 'enana yanonona 'igwae, "Umai." ⁶'Enega yadunedune ga 'ebweu osi gaigaina 'iapwesama, ta 'ana togelu nina ma ina 'ebe 'etopwapwa masula manuna. ⁶Ga 'ebweu 'atuwa 'enana yobai nidi ata gamwagamwanidiyega yanonona, 'igwae, "Witi 'ana 'etopwapwa 'ebweuna 'ana maisa 'ebweuna kina, ta wate ba'ali^q 'ana 'etopwapwa 'etoi 'ana maisa 'ebweu kina, ta esi olibe bunamina be oine geya'abo wagitogitoodi."

⁷'Enega lami nina wate losipwa eatana 'ili'amina, ga wate yobai eatana 'enana yanonona, 'igwae, "Umai." ⁸'Enega yadunedune ga 'ebweu osi 'ana 'ita 'atuwa tupwana wakewakekena 'iapwesama. Ta 'ana togelu nina 'ana esana Mwawasa, ta wate tomwawasa yaluyaluwadi 'idi 'asa selabenaya 'imulimuliya, ga loina si'ewena Yaubada 'enega be 'aene tomota yaudi sida pe'udi saiyege be botanega be muyega be wate bosasa 'ediyega, ta nigeya 'aene tomota maibo'ada, ta tuga 'abo nadigega bale'u maibo'ana 'enaya boda taeguyaiyedi 'adi yau ata, ta 'ebweuna boda 'ediyega maibo'adi sipe'udi, be boda 'etoi namo situpwa.

⁹s^t'Enega wate lami nina losipwa enimana 'ili'amina, ga Yaubada 'ina 'ebe taliya 'ubuninaya 'ana tosimanao yaluyaluwadi ya'itedi, taudi lowa bale'uya Yaubada 'ina ona 'ana tosimanao bobo'adi, ta gete manuna tomota sietalauwaledi ga siloemwawasidi. ¹⁰Ta yaluyaluwa nidi 'enadi sinabwanega sibwaubwau, sigwae, "Inapwana Toewaiwai sayo, 'oyo 'esaseyo ta palupaluyo, to tutu 'ena be 'enega 'ama toloemwawasao bale'uya 'uda loinedi 'idi to'umalinao manudi?"

^p 6:1 Et 5:1 ^q 6:6 *ba'ali*: masula bagulaya siasona 'ana 'ita laisi nai witi nadigega.

^r 6:8 Isi 14:21 ^s 6:9 Yo 16:2 ^t 6:10 Et 16:5-7

¹¹ ^u'Enega yaluyaluwa nidi 'adi 'oamao wakewakekedu 'i'ebwa'edi, ga 'ieonedi be tuta gidalina namo sida eyawai'ata, 'ana laba 'adi wate gosediyao me bale'u sida loemwawasidi, nadigega tuga lowa taudi siloemwawasidi Yaubada 'ina guinuwa manuna, be 'enega 'abo 'adi sawasawa ni'atu sawesawenaya, 'enega Yaubada me bale'u nidi 'ida loinedi.

¹² ^v'Enega lami nina wate losipwa esikisina 'ili'amina ga mwani'ini'i sinabwana 'iniuniu, ta sinala 'iguguyoi, 'ana 'ita 'atuwa 'ule siyasiyana, ta wate nawalae 'ana 'ita maibo'ana bweyabweyalina, lala nadigega, ¹³ ta kwadimao galewega sibe'uma, 'atuwa kaiwe 'iuwa ta yagila waiwaina 'itowama ga uwanao nidi sisagusaguma.

¹⁴ Ta galewa ya'itenan 'atuwa pwepwai nadigega 'i'enunumina ga 'isawala, 'enega 'oya be salu 'ebweuna 'ebweuna 'adi 'autui sipilisinena.

¹⁵ ^wTa bale'u 'ana 'inapwanao be tolinoao be saiya 'adi 'inapwanao be toesaesao be toewaiwaiyao, ta wate toanuganao be 'idi topaisewao, maibo'adi sidena 'oyaya, ga duluwa be gulewa 'ediyasikwaiya. ¹⁶ 'Enega sibwau gulewa be 'oya 'ediyasikwaiya, "Wada be'uma debamaya, be geya'abo tauna 'ebemi esaesa 'ena 'imiyatowa 'ida 'ita'itama, be wate lami nina geya'abo 'ida 'ita'itama. ¹⁷ Manuna lami 'ina gamwasowala 'ana 'asiyata sinabwana ni'atu 'iapwesama, ta nigeya 'ebweu yaita sawesawenaya be 'iewaiwaisine."

Me Isileli debadiya Yaubada 'ana we'iwe'iyaya situtu epa'iyena

7 ¹ Yage gete mulinaya aniloseyao ata ya'itedi sitootoolo bale'u senanao 'adi yau ata 'ediyasikwaiya. Anilose nidi yagila 'adi yau ata sigiyaidi be 'aene geya'abo bale'uya nai olaya nai kaiwe 'ediyasikwaiya, ² manuna gete Yaubada 'ina tagwala be 'aene yagila nidi bale'u be ola sida gieto'umaliyedi.

'Enega 'ebweu wate anilose ya'itenan sinala 'ina 'ebesae 'enega 'imeemai ma ina 'ebe tu'epa'i be 'aene Yaubada miyamiya atayana 'ana we'iwe'iyaya 'ida sa'u tomota debadiya. Anilose nina 'ibwau anilose ata nidi 'ediyasikwaiya, ³ ^x'igwae, "Geya'abo bale'u nai ola nai kaiweyao wagiegie to'umaliyedi 'ana laba 'ida Yaubada 'ina toguinuwao 'adi we'iwe'iyaya 'ada sa'u debadiya."

⁴ 'Enega we'iwe'iyaya nina sisa'una 'aina me Isileli debadiya, ga muliyega me Isileli nidi 'adi yau yanonodi, nate wani analedi be potipowa tausani 'ana maibo'ana, boda Isileli nidi 'ediyega.

⁵ Susu Yuda 'ediyega we'iwe'iyaya nina tomota tuwelo tausani debadiya sisa'una, be Lubeni tuwelo tausani, be Gada tuwelo tausani, ⁶ wate Aseli tuwelo tausani, be Napitalai tuwelo tausani, be Manase

^u 6:11 Et 3:4-5, 7:9, 13-14 ^v 6:12 Md 24:19 ^w 6:15 Ais 2:19 ^x 7:3 Isi 9:4; Et 9:4

tuwelo tausani, ⁷wate Simioni tuwelo tausani, be Libai tuwelo tausani, be Isaka tuwelo tausani, ⁸wate Sebuloni tuwelo tausani, be Yosepa tuwelo tausani, be wate Benamina tuwelo tausani.

Pwalu sinabwa wawasae

⁹yMuliyega, yadunedune ga pwalu sinabwa wawasae ya'itedi, nigeya aisawa. Tomota nidi 'ebeloina 'ebweuna 'ebweuna 'ediyega, be susu 'ebweuna 'ebweuna 'ediyega be boda 'ebweuna 'ebweuna 'ediyega be 'enana 'ebweuna 'ebweuna 'ediyega, maibo'adi 'ebemi esaesa matanaya be wate Lami matanaya sitootoolo ma 'adi 'oama wakewakekedi, ta magimagi yawadi sigiyaldi, ¹⁰ga 'enadi sinabwanega sibwaubwau, sigwae, "Ada 'etoseyana 'ida Yaubada 'enega, tauna 'ebemi esaesa 'ena 'imiyatowa, ta wate Lami nina 'enega."

¹¹Ga aniloseyao nidi 'ebemi esaesa nina be wate 'inapwanao nidi be yobai nidi ata sitoolo sakowasiyedi, ga maibo'adi sibe'u sanamwa'uta ga Yaubada 'ena sibwagobwago, ¹²sigwaegwae, "Ona'ai'aila, 'ida Yaubada nina 'ena tada lotuputupu, be 'awa esaesa be mwalatoi be lokagutoki be 'amayaba be waiwai sida miyaataya 'enaya."

¹³^z'Enega 'inapwanao nidi 'ediyega 'ebweuna 'ienaida 'eguya, 'igwae, "Yaisigedi getedi ma 'adi 'oama wakewakekedi? Ta mane 'enega simai?"

¹⁴^aGa 'ena yagwae, "Inapwana 'oyo 'umwalamwalatonidi, 'abo'agu nigeya."

'Enega 'ieonegu, 'igwae, "Gete tomota nidi bale'u 'elouyanao 'ediyega situpwa, ta 'adi 'oamao nidi Lami nina lalanega si'utudi ga siwakekedi. ¹⁵^bNate 'alena 'enega Yaubada 'ina 'ebemi esaesa matanaya simiyami, ta 'asiyata be boiboi 'ediyia 'ina guinuwao siguiguinuwedi 'ina Anuwa Tabu solanaya. Ta wate Yaubada nina 'ina 'ebemi esaesa 'ena 'imiyatowa, tauna 'ida 'ita'i'isidi, ¹⁶be geya'abo wate sibotabotana nai ton'a'adi 'iyapayapasa, ta geya'abo wate ala nai to'ase yaiyaina 'enega si'elo'elouya. ¹⁷^cManuna Lami nina, tauna 'ebemi esaesa solanaya 'imiyami, tauna 'adi to'ita'i'ita, be 'enega 'ida anuganedi bwasi bobo'adi 'ediyia, yawasidi manuna, ta Yaubada tauna mataseludi 'ida lo'i'ilidi."

Losipwa esebechina manuna

8 ¹'Enega lami nina losipwa esebechina 'ili'amina, ga nigeya 'ebweu wate galewega ona nai galala simeema tuta kukupana namo 'enaya. ²Ta muliyega anilose nidi sebeni Yaubada matanaya sitootoolo ya'itedi, ga Yaubada 'idi yoguli 'ebweuna 'ebweuna 'i'ebwa'edi.

^y 7:9 Et 5:9 ^z 7:13 Et 7:9 ^a 7:14 Md 24:21 ^b 7:15 Ais 49:10 ^c 7:17 Et 21:4; Sam 23:2; Ais 25:8

³^dTa wate 'ebweu anilose ma ina gaeba goula 'imai, ga 'ebe taliya selabenaya 'itoolo. Ta 'ebe taliya nina nate Yaubada 'ina 'ebemi esaesa selabenaya. 'Enega Yaubada gaeba goula nina 'iloemaena gala'u 'enega, ga anilose nina 'i'ebwa'ena, 'enega anilose nina 'ebe taliya 'ena 'isa'una be 'igabu. 'Igabuna ga 'asuna ta maina bobo'ana be wate Yaubada 'ina tomotaiyao 'idi sidasidao situ'e leleleya galewaya.

⁴'Enega gaeba nina magala'u 'isa'una Yaubada matanaya, ta sidasida gala'u 'asuna ma'iyana situ'etu'e, ga 'ana laba 'i'ala egumwalina. ⁵'Enega anilose nina gaeba nina kakaena 'i'ewena, ga 'ebe taliya nina 'enega kaiwe 'ala'alasina 'i'ewena, ga 'enega gaeba nina 'iloemaena, ta 'iula ebusiyena bale'uya, ga gote 'ena namala be wepalala be 'aidi 'enana ta wate mwani'ini'i siapwesa.

Yoguli nidi simu'edi

⁶'Enega anilose nidi sebeni 'idi yoguli nidi sigiyaidi sabi mu'edi.

⁷^eTa 'ebweu 'ina yoguli 'imu'ena ga 'usana 'ana 'ita dumadumana 'iebusi, 'ana 'ita aisi pulipulidi nadigega, ga wate kaiwe 'ala'alasina ta lala ma'edi sisagusaguma bale'uya, ga 'i' alasina. 'Eguma bale'u maibo'ana 'ana weyala 'etoi, 'ebweu sena 'i'alasi ta 'eluwa sena nigeya. Ta sena nina 'i' alasina 'enaya kaiwe be pwatula maibo'adi wate 'i'ala egumwalidi. ⁸^f'Enega anilose 'eluwnena 'ina yoguli 'imu'ena, ta 'ebweu yage 'ana 'ita 'atuwa nadigega 'oya sinabwana 'isabesabelulumga ga ni'uya siulena, 'enega ola 'ielala. 'Abo ola maibo'ana 'ana weyala 'etoi, ta 'ebweuna 'ediyega 'ielala, ta 'eluwa bobo'adi. ⁹Ta ola nina 'ielala solanaya iyana maibo'adi simwawasa, ta waga maibo'adi 'enaya sieligeidi.

¹⁰'Enega anilose 'etonina 'ina yoguli 'imu'ena, ta kwadima sinabwana 'i'ala'alata 'ana 'ita 'atuwa gudala galewega 'ibe'uma, ta bale'u nina 'ana weyala 'etoi ga 'ebweuna weyala nina 'ena kwadima 'ibe'u ga bwasinao sidalele. ¹¹Kwadima nina 'ana esana Dalele, ta tomota yaudi bwasi nidi daleledi 'ediyega sinuma ga simwawasa.

¹²'Enega anilose eatana 'ina yoguli 'imu'ena ga sinala senana 'ebweu 'iguguyoi ta sena 'eluwa bobo'adi, ta wate nawalae senana 'ebweu 'iguguyoi ta sena 'eluwa bobo'adi, ta wate kwadimao 'abo taweyalidi sena 'etoi 'ediy, 'ebweu sena 'ana kwadimao siguguyoi, ta sena 'eluwa 'ediy simaemaedana. 'Enega 'asiyata maibo'ana 'ana weyalao 'etoi, 'ebweu tuta guguyoi, ta 'eluwa bobo'adi. Nadigega wate boiboi, 'ebweu tuta guguyoi, ta 'eluwa bobo'adi.

¹³^gTa yadunedune ga magisubu sinabwana 'itaetaeya galewaya ya'liten, ga 'enana sinabwana yanonona, 'igwae, "Oiyoi nuwa'ole'olemi, 'omi bale'u 'ana tomiyanao, manuna 'abo aniloseyao yoguli 'etoi simu'edi, mwau sinabwana 'iapwesama."

^d 8:3-4 Et 5:8 ^e 8:7 Ioe 2:30; Sia 9:23 ^f 8:8-9 Sia 7:20-21 ^g 8:13 Et 9:12, 11:14

9 ¹'Enega anilose enimana 'ina yoguli 'imu'ena, ga 'ebweu kwadima ya'itenan ni'atu galewega 'ibe'uma bale'uya, ta kwadima nina gaula sinabwana 'ana 'ebe gigege 'i'ewena, ²ga gaula nina 'igigegena, ga solanega bwawa 'iapweapwesama, 'atuwa nadigega kwau sinabwana, ga sinala 'iguguyoi, ta wate bale'u maibo'ana 'iguguyoi gaula nina bwawana 'enega.

³^hTa bwawa nina solanega kipawa simwa'umwa'utama bale'uya, ta 'idi waiwai silobena nadigega ganiyeya 'idi waiwai, ⁴ⁱta wate Yaubada 'i'etobodedi be geya'abo pwatula sigiegie to'umaliyedi, nai kaiweyao, nai bagula, ta esi tomotai nidi taudi nigeya Yaubada 'ana we'iwe'iyaya 'ediya, taudi sida gieto'umaliyedi. ⁵Ta kipawa nidi nigeya 'adi tagwala be tomota siloemwawasidi, ta tuga sigie 'elouyaedimo nawalae nima namo 'ediya. Ta 'elouya nidi sinabwadi, nadigega tuga ganiyeya 'idi go'i.

⁶Ta nawalae nidi 'ediya to'elouya nidi mwawasa sida 'ala'ala'i'imi, ta geys'abo simwawamwawasa, manuna mwawasa si'ebesa yogeyena. ⁷Ta kipawa nidi 'adi 'ita 'atuwa osi ni'atu sigibubudi saiya manuna, ta debadiya 'atuwa peyaula esaesa sisa'udi, ta maninidi 'atuwa tomota maninidi, ⁸ta wate 'uya'uyadi 'atuwa iine 'uya'uyadi, ta saladi 'atuwa laiyoni saladi. ⁹Ta lumalumadi si'aubodedi 'ana 'ita 'atuwa kainumu 'ediyega. Ta papedyao 'idi dudu 'atuwa osi ma idi wagalisilisi sipilipili saiya 'enaya. ¹⁰Ta wate mayuyudi, 'atuwa ganiyeya yuyudi, manuna yuyudiyega sawesawediya be tomota sibadidi, be nawalae nima 'ediya si'elo'elouya. ¹¹Ta wate ma idi tololina, tauna anilose nina gaula nina 'ana to'ital'i'ita, 'ana esana Ibeliu 'enadiyega sigwae, "Abadoni," ta 'ena Gilisi sigwae "Apoloni," ta 'adi gibui nate "Toepe'u." ¹²^jTa ni'atu mwau 'ebweuna 'igumwala, ta 'etamo wate mwau 'eluwa simeema.

¹³'Enega anilose esikisina 'ina yoguli 'imu'ena, ga 'ebweu 'enana yanonona 'imai 'ebe taliya kunanao ata 'ediyega, 'ebe taliya goula nina Yaubada matanaya 'itootoolo. ¹⁴Ta 'enana nina anilose esikisina ma ina yoguli 'ena, 'igwae, "Anilose nidi site ata yonionidi 'awabwasi sinabwana 'ana esana Yupoletisi 'enaya 'uli'amidi, be sitatauya." ¹⁵^kTa ni'atu anilose nidi ata 'ili'amidi ga sitauya, manuna tuta nina 'ana 'asiyata, be nawalae nina, be yakwala nina manuna ni'atu sigibubuna, be 'aene tomota yau wawasae sida loemwawasidi. Nate 'abo tomota 'ana maibo'ana bale'uya taweyalidi boda 'etoi, be 'ebweu boda siloemwawasidi, ta boda 'eluwa situtupwa.

¹⁶Ta ni'atu tolosaiyao nidi 'idi bodao 'adi sawasawa yanonona 'aene 'eluwa analedi miliyonao, maibo'adi osi 'ediyega sipilipili. ¹⁷Ta gete nadigega madawaliguna 'ena osi nidi ya'itedi, ta 'adi togeluyao nidi ma 'adi 'aubodaboda lumalumadiya sisa'udiya, 'aidi bwneyabweyalidi ta

^h 9:3 Sia 10:12 ⁱ 9:4 Et 6:16 ^j 9:12 Et 8:13 ^k 9:15 Et 8:7-12

'aidi kalakalawidi ta 'aidi laulaudi. Ta osi nidi bulubuludi 'atuwa layioni bulubuludi, ta kaiwe sabelulu be 'asu be gulewa yaiyaidi 'awadiyega siapweapwesa.¹⁸ Boda 'etoi nidi bale'uya 'ediyega, boda 'ebweu siloemwawasidi, gete yage 'etoi nidi 'ediyega, nate kaiwe sabelulu be 'asu be gulewa yaiyaidi, ta boda 'eluwa simiyami.¹⁹ Manuna osi nidi 'idi waiwai 'awadiya be yuyudiya simiyami, ta yuyudi nidi 'atuwa mwata ma'awadi, ta 'ediyega tomota sigie'elouyaedi.

²⁰ Ta tomota nidi maibo'adi, taudi nigeya siesiesilae yage nidi to'umalidi 'ediyega, nigeya sinuwanuwa'ebuni be 'aene 'idi 'ebe emisa kabokaboyaao sida guitoyasedi, ta esi sigiyai pa'alidi ga sibwagobwago 'ediya. Yage nidi nadigega Taumudumudulele be welabanao, be wate yage nidi taudimo nimadiyega siguinuwedi, nadigega tokwaluiyao nate goula be siliba be kopa be gulewa be kaiwe be. 'Ebe emisa nidi getedi nigeya sawesawediya be sidudune nai sienono nai silopili dadana.²¹ Ta wate tomotai nidi getedi nigeya sinuwanuwa'ebuni loemwawasa be nabwasuwa be loelata be 'ipwala 'ediyega, ta sa'i debadi 'ipa'ala.

Anilose 'ebweuna ma ina pwepwai

10 ¹'Enega wate 'ebweu anilose waiwaina galewega 'iebusima ya'iten, ta pwanega 'ie'oama, ta ulele debana 'itoolo sakowasiyena, ta maninina 'ana 'ita 'atuwa sinala, ta wate 'aena sinamanamala 'atuwa kaiwe sabelulu. ²Anilose nina nimanaya pwepwai nadigega gimibuki, ta gidalina, 'igiyaina ta neyaneyasina, 'enega 'iebusima ga 'ae 'ataina olaya 'iasaena, ta 'ae gegeumina bale'uya. ³'Enega 'enana sinabwanega 'ibwau, 'ana nono nadigega layioni 'ibwaubwau. Ta ni'atu 'ina bwau 'igumwala ga wepalala 'adi yau sebeni 'ina ona sie'isena. ⁴Wepalala nidi 'enadi yanonodi ga ni'atu be ya'etoladidi, ta galewega 'enana yanonona 'eguya 'igwae, "Wepalala 'enadi site sebeni 'unonodiya 'uda kwaiyedi, ta geya'abo 'u'eto'etoladidi."

⁵'Enega anilose nina tauna ya'itenaya ola be bale'u 'ediy'a 'itoottolo, nima 'ataina 'igitu'eyena galewaya, ⁶ga 'isawa tamatamana Yaubada 'ana esanega, tauna miyamiya atayana, ta wate tauna galewa ta yage maibo'adi solanaya, ta wate bale'u ta yage maibo'adi solanaya, ta wate ola be yage maibo'adi solanaya, 'adi tomweluluwa. Ta anilose nina 'igwae, "Ni'atu tuta 'iapwesama,⁷manuna 'abo anilose esebenina 'ina yoguli 'imu'ei, Yaubada 'ina nuwena kwaikwaiyidi maibo'adi 'ida losalonidi, to'ase nadigega 'ina topaisewao taudi palopitao lowa 'ediy'a 'isimanena."

⁸Ta 'enana nina galewega yagimi nononaya wate 'eguya 'ionaona, 'igwae, "Utau ya be pwepwai nina neyaneyasina anilose nina 'itoottolo

¹ 9:20 Et 16:9, 11; Sam 135:15-17

olaya be bale'uya nimanega 'u'ewa." ⁹'Enega yatauya ga anilose nina 'ena pwepwai nina yasidena. 'Enega pwepwai nina 'i'ebwa'egu ta 'ieonegu, 'igwae, "Bobo'ana, 'u'ewa be 'u'a'ani. Ta 'abo 'utonei, 'etamo 'ana dalele gamwamuya 'ulotoo, ta esi 'awamuya 'ana lootoona dibidibina, 'atuwa mu'awa." ¹⁰'Enega pwepwai nina ya'ewena ga ya'enina, ta 'awaguya yalotoona dibidibina, 'atuwa nadigega mu'awa, ta ni'atu yatonena ga gamwaguya yalotoona dalele yaita.

¹¹Ta wate 'eguya 'igwae, "Illobwenena be 'oyo Yaubada 'ina onao bodoa be 'ebeloinao be 'enanao be kiniyao manudi 'uda simana limanedi."

Yaubada 'ana tosimana nidi 'eluwa

11 ¹Muliyega 'etoguna 'ebweuna 'i'ebwa'egu 'atuwa 'ebe 'etopwapwa, ta 'enega 'ieonegu, 'igwae, "Utoolo be Yaubada 'ina Anuwa Tabu ta 'ebe taliya wate 'u'etopwapwadi, be wate tobwagobwgoyao solanaya 'usawadi. ²"Ta esi Anuwa Tabu mwaumwauna geya'abo 'u'eto'etopwapwa, manuna mwaumwauna nate 'owagao manudi, taudi nate nigeya me Yudia, be 'aediyega Yaubada 'ina 'asa nina sida giebaili nawalae potitu soladiya. ³Ta tosimana 'eluwa yaetunedi, ma 'adi 'oama 'atuwa nadigega kwabulao 'adi 'oama, be Yaubada 'ina ona sida simane 'asiyata tuwelo analedi be sikisiti nidi soladiya."

⁴"Tosimana 'eluwa nidi 'atuwa kaiwe olibe 'eluwa, ta wate 'atuwa mayale nidi 'eluwa sitootoolo bale'u 'ana 'Inapwana matanaya. ⁵Ta 'eguma yaita 'itoo be 'ietalauwala tosimana nidi 'ediya, 'awe sabelulu 'awadiyega 'iapwesa be 'adi talauwala nina 'igieto'umaliye, be gete 'enega 'adi talauwalao siloemwawasidi.

⁶Siteluwa gete ma idi loina, be tutu nidi Yaubada 'ina ona sisimasimana, 'usana galewega si'etobodedi. Wate ma idi loina wewelupwa 'ediya, be sida elala. Wate ma idi loina mwau be 'elouya manudi, be 'abo to tutu 'ena nuwanuwadi be mwau nidi siapwesama sida apwesa tuga.

⁷"Enega tosimana 'eluwa nidi 'idi simana tomota 'ediya 'igumwalaya, ga yobai 'ebweu gaula nina sinabwana 'enega 'iapwesama, ga 'ilosaiya tosimana nidi 'ediya, ta 'iewawai ga 'iloemwawasidi. ⁸Ta kokowadi sida 'eno besobeso 'asa sinabwana solanaya. 'Asa nina lowa 'ida 'Inapwana 'ena sigiekeloseyena, ta 'asa nina 'ana kunuwadawada sieesena Sodoma, nai Itipita.

⁹Tomota yauyaudi sida mai bodoa be susuyao be 'enanao be 'ebeloinao 'ediyega, be 'enega kokowa nidi sida 'ita'itadi 'asiyata 'etoi ta tupwana 'ediya. Ta kokowao nidi 'adi sa'u'ali'ali si'etobodenaa. ¹⁰Ta me bale'u

^m 11:2 Lu 21:24; Et 13:5 ⁿ 11:4 Sak 4:11, 14 ^o 11:7 Et 13:1

sida gwausowala tosimana 'eluwa nidi 'idi mwawasa manuna, be sida gimasula, be oboboma sida 'ebwaya 'ebweuna 'ebweuna 'enaya, manuna palopita 'eluwa nidi 'elouya sinabwadi me bale'u 'ediya sime'edi.

¹¹ Ta 'asiyata 'etoi be tupwana sigumwala, ga Yaubada yawasina 'ediya 'il'ebwaya, ga sitoolo, 'enega tomota yaudi si'itedi, ta simatauta sinabwana. ¹²^p'Enega palopita 'eluwa nidi 'enana galewega sinonona, 'ionaona 'ediya, 'igwae, "Watu'ema bada." 'Enega pwanega situ'etu'e, ta 'adi talauwalao nidi siduneduneyedi. ¹³ Tuta nina gote 'enaya mwani'ini'i sinabwana 'iapwesa, ga 'asa nina sinabwana 'ana weyala sanau 'ediyega 'ebweu sena 'iligeina, ga tomota 'adi yau sebeni tausani simwawasa mwani'ini'i nina 'enega. Ta tomota nidi taudi situpwa simatauta 'ai'aila, 'enega Yaubada nina galewaya situpuna 'ina waiwai manuna.

¹⁴ ^qTa 'elouya 'eluwena ni'atu 'igumwala, ta 'etonina 'iabe 'iapwesa.

Yoguli esebechina 'imu'ena

¹⁵ ^r'Enega anilose esebechina 'ina yoguli 'imu'ena, ta galewega 'enadi sinabwana 'enega sigwaegwae, "To'letoseyanina matamana Yaubada ni'atu sietoloina bale'u 'ina 'ebeloinao maibo'adi 'ediya, ta geya'abo 'idi loina nina 'igumwagumwala."

¹⁶ ^sTa 'inapwanao nidi site tuweniti powa Yaubada matanaya simiyatowa 'idi 'ebemi esaesa 'ediya, taudi sibe'u sanamwa'uta ga 'enaya silotuputupu, sigwaegwae:

¹⁷^t"Ima 'Inapwana Yaubada Toewaiwai sayo, 'oyo 'umiyami batuwa, be tuta lowa 'ediya 'umiyami, 'alokagutoki 'emuya, manuna 'imu waiwai sinabwana 'ugieapwesena, 'enega 'ue'ale be 'uda loina. ¹⁸ Taudi nigeya me Yudia sigamwasowala 'ai'aila, ta esi 'imu bwa'omatanan 'ana tuta 'iapwesama be tomwawasao sitoolo be 'uloinedi, ta 'imu palopitao 'adi e'isa 'uda 'ebwa'edi, be 'imu tomota maibo'adi 'adi e'isa 'u'ebwa'edi, taudi sinasinabwadi be gidagidalidi 'ediya, manuna taudi sana 'amu to'amayabao. Ta esi bale'u 'ana togieto'umaliyao 'oyo 'uda gieto'umaliyedi."

¹⁹ 'Enega Yaubada 'ina Anuwa Tabu galewaya 'igigegena, ga Dedewaga Tabu, Anuwa Tabu solanaya, ya'iten, ga Dedewaga nina solanaya 'ina onaupaupa 'ana buki 'umiyami. 'Enega namala, be 'enanao, be wepalala 'ina dudu, be mwani'ini'i, be 'usana pulipulidi ta pa'alidi, siapwesama.

Waine be yobai mabulubulunao sebeni

12 ¹'Enega galewaya 'ebe nuwaowana sinabwana 'iapwesa, nate waine 'ebweuna ta 'ana 'oama sinala nadigega, ga nawalae 'ena

^p 11:12 2 Kin 2:11 ^q 11:14 Et 9:12 ^r 11:15 1 Ko 15:24-25; Et 19:6; Dan 7:13-14

^s 11:16 Et 4:4, 9-10 ^t 11:17-18 Et 1:8, 20:11-13; 2 Ko 5:10

'itootoolo, ta debana 'ana iyala kwadima tuwelo sisaesae. ²Ta waine nina 'eu'euwanina ta 'i'elo'elouya ga 'ibwaubwau manuna 'iedadama.

³Wate 'ebweu 'ebe nuwaowana galewaya 'iapwesa, nate yobai bwneyabwetalina ta sinabwana, ta bulubulunao 'adi yau sebeni be kunanao 'adi yau sanau, ta bulubulunao 'ediya peyaula esaesa simiyami.

⁴Ta yuyunega kwadima yaudi 'iunudi ga 'iuledi bale'uya. 'Eguma kwadima maibo'adi taweyalidi 'etoi sena 'ediya, 'ebweu sena 'ena 'iunu egumwalidi ta 'eluwa sena 'ediya situpwa. Ta yobai nina bwneyabwetalina waine matanaya 'itootoolo, be 'abo 'ienatuna, gwama nina 'i'a'ani.

⁵'Enega waine nina 'ienatuna ga gwama me'olotona, tauna 'aene sena maibo'adi 'adi tololina waiwaina, ta gwama nina Yaubada 'i'au'ewena tauna 'ina 'ebemi esaesa 'enaya. ⁶Ta waine nina sena mwatui daita 'ena 'idena. Gote 'ena waine 'ina sena Yaubada 'igibubuna, be 'ena 'ida 'ita'i'isi 'asiyata 'ana dudula nadigega tuwelo analedi be sikisiti.

⁷^u'Enega galewaya saiya 'iapwesa. Saiya nina Maikeli ma ina aniloseyao be yobai nina bwneyabwetalina ma ina aniloseyao ma'ediyao silosalosaiya. ⁸Ta yobai ma ina bodao nigeya kapekapeyana be siewawai Maikeli ma ina bodao 'ediya, ta 'enega yobai nina ma ina aniloseyao galewega sipa'idi ga siula mwa'utedi bale'uya. ⁹'Yobai nina bwneyabwetalina ta sinabwana, tauna gimimwata 'ana esana Seitani, 'atuwa Taumudumudulele, tauna bale'u 'ana tokabo. Tauna ma ina aniloseyao maibo'adi bale'uya siula mwa'utedi.

¹⁰^wTa muliyega galewega 'enana sinabwana yanonona, 'igwae, "Gete tuga Yaubada 'ina waiwaiyega 'ida loineda, be 'i'etoseyeda. Ta wate 'ada To'etoseyana nina 'ida etoloina 'edaya. Manuna tasidao 'adi toe'ewa, tauna lowa boiboya be 'asiyataya Yaubada matanaya 'itootoolo ta 'ie'ewadi, ni'atu tauna galewega siula apwesena. ¹¹Ta tasidao nidi ona'ai'aila yawasidi sitagwalena be Keliso manuna simwamwawasa, 'enega Seitani nina ma'edi silosaiya ga taudi siewawai. Ta 'idi ewawai Lami lalanega, ta wate 'idi simana Lami manuna 'enega.

¹²'Enega 'omi tomiya galewa maibo'ami wada gwausowala, ta sa'i 'omi bale'u be ola 'ana tomiyanao mwau sinabwana 'emiya, manuna Seitani ni'atu 'imwa'utawa 'emiya, ta ma ina gamwasowala, manuna 'imwalamwalatoni 'aene 'ina tutu kukupana tuga 'imiyami."

¹³Gote 'ena yobai nina bwneyabwetalina 'inuwa sabwalena 'aene ni'atu bale'uya siula mwa'utena, 'enega 'ipa'ina waine nina, tauna gwama me'olotona 'ienatunena. ¹⁴Ta waine nina magisubu sinabwana papenao Yaubada 'i'ebwa'ena, be 'enega 'itataeya 'ina sena mwatui daitaya, be gote 'ena Yaubada 'ida 'ita'i'isi yakwala 'etoi ta tupwana 'ediya, be geya'abo mwata nina 'igiyagiyai. ¹⁵'Enega mwata nina 'awanega bwasi

^u 12:7 Yu 1:9 ^v 12:9 Nug 3:1; Et 20:2-3 ^w 12:10 Yob 1:9-11; Sak 3:1

'isiwa apwesena 'atuwa muluwa waine nina mulinega, be 'enega 'ida doe.
 16 Ta bale'u waine nina 'ilemena, manuna bale'u nina 'ilegegena ga bwasi
 maibo'ana 'itonena. 17-18 ^xEnega yobai nina 'igamwasowala 'ai'aila waine
 nina 'ena, ga 'itauya ga waine nina 'ina susuyao 'ilosaiyedi, taudi nate
 Yaubada 'ina ona 'ana toemetamatanao ta Yesu 'ana tosimanao.

'Enega yobai nina bwneyabweyalina kaukauya 'itoolo baula.

Yobai 'eluwena

13 ^{1^y}Enega yadunedune ga 'ebweu wate yobai tauna olega 'itu'ema,
 kunanao 'adi yau sanau, ta bulubulunao 'adi yau sebeni, ta
 kunanao nidi maibo'adi ma 'adi peyaula esaesa, ta wate bulubulunao 'ediy
 esana to'umalina si'etoladidi. ² Ta yobai nina ya'itenan 'ana 'ita 'atuwa sipu,
 ta sinabwana, ta 'aenao 'adi 'ita 'atuwa beya 'aedi, ta 'awana 'atuwa laiyoni
 'awadi. Ta gimi yobai nina bwneyabweyalina 'ina waiwai yobai nina olega
 'i'ebwa'ena, ta wate 'ina 'ebemi esaesa be 'ina loina sinabwana 'i'ebwa'ena.

³ Ta yobai nina olega bulubuluna 'ebweuna 'ana 'ita 'atuwa esiesilaena,
 ga ni'atu mwawasega 'ibobo'ana limana. Ga gote 'ena tomota maibo'adi
 nuwadi 'iowana 'ai'aila, ga yobai nina olega simulyiena. ⁴ Ta wate
 tomota yauyaudi gimi yobai 'enaya sibwagobwago, manuna ni'atu
 loina 'i'ebwa'ena yobai nina olega 'ena. Ta wate yobai nina olega 'ena
 sibwagobwago, ga sigwae, "Nigeya 'ebweu yaita 'ina waiwai yobai gete
 nadigega, be 'enega 'ena 'ida losaiya."

⁵ Ta yobai nina ni'atu tagwala 'ilobena be yage to'umali wawasaedi 'ida
 'inanedi, ta wate ma ina loina nawalae potitu 'ediy. ⁶ Enega yobai nina
 Yaubada 'i'awa to'umaliyena, ga 'ana esana be 'ina sena ta wate galewa
 'ana tomiyanao 'i'awa to'umaliyedi.

^{7^z} Ta wate tagwala 'ilobena be 'aene Yaubada 'ina tomotaiyao 'ida
 losaiyedi be 'ida ewaiwai, ta wate ma ina loina boda maibo'adi 'ediy,
 be susuyao be 'enanao maibo'adi 'ediy, be 'ebeloina maibo'adi 'ediy.

^{8^a} Ta me bale'u yauyaudi ma'etamo 'ena sibwabwago, nate taudi 'abo
 nigeya 'adi esanao simiyami yawasi bukina solanaya, buki nina Lami
 nina siloemwawasina 'ina buki, manuna buki gete solanaya taudi 'adi
 esanao lowaenei 'igimi 'etoladidi, 'enega muliyega bale'u 'imweluluina.

⁹ Enega 'abo 'omi yaita matenana 'ida nono, ^{10^b}manuna

"Abo yaita sigiyai, sida giyai tuga, ta wate yaita 'abo sisaisiya 'enega
 siloemwawasi, sida loemwawasa tuga."

Ona gete 'enega Yaubada 'ina tomotaiyao sida toolopa'ala be sida
 etapewa waiwai.

¹¹ Enega wate 'ebweu yobai 'etonina ya'itenan bale'uyega 'iawpesama,
 ta kunanao 'eluwa 'atuwa lami kunana, ta 'enana 'atuwa gimi yobai

^x 12:17 1 Pi 5:8 ^y 13:1 Et 17:3, 7, 12 ^z 13:7 Et 11:7 ^a 13:8 Et 3:5 ^b 13:10 Et 14:12

nina bwewayabweyalina 'enana. ¹²Ta yobai olega 'ina waiwai maibo'ana yobai auwauna 'i'ebwa'ena be 'aene tauna 'ida loina, ta yobai olega 'ida dunemo. 'Enega yobai nina auwauna me bale'u maibo'adi 'iloinedi, ga yobai olega 'ena sibwagobwago, tauna lowa 'iesilae ga 'ibobo'ana limana. ¹³^cTa wate edeedede 'iguinuwedi, nadigega kaiwe sabesabeluluna 'iguinuwena, ga galewega 'ibe'uma bale'uya tomota matadiya. ¹⁴Ta ni'atu tagwala 'ilobena be 'enega yobai nina olega matanaya edeedede nidi 'iguinuwedi, ga gote 'ena me bale'u maibo'adi 'ikaboedi. Ta 'ina kabo nidi 'ediyia 'igwae, "Tokwalui 'ebweuna wabubu, be 'ana 'ita 'atuwa yobai nina sisisiayega 'iesilae, ga 'ibobo'ana limana."

¹⁵'Enega sibubunaya ta yobai nina auwauna ma ina loina, 'enega tokwalui nina yawasina 'i'ebwa'ena ga sawesawenaya 'iona, 'enega 'iloina 'aene 'abo tomota nigeya 'ena sibwagobwago, mwawasa sida loba. ¹⁶Ta wate maibo'adi 'iloinedi, gidagidalidi be sinasinabwadi, toesaesao be gomabesoyao, ta wate 'inapwanao be topaisewao, be 'aene nima 'ataidiya nai debadiya 'ana we'iwe'iyaya sida sa'udi, ¹⁷^dta 'ediyia loina pa'alina 'isa'una, be taudi 'abo we'iwe'iyaya nina nigeya 'ediyia, geya'abo wate sida egiegimwane, nai sigimwagimwane, 'ana laba yobai nina 'ana we'iwe'iyaya si'ewa bemi, nate 'ana esana nai 'ana numela. ¹⁸Ta gete 'ana mwalatoi 'imiyami be 'abo yaita ma ina mwalatoi yobai nina 'ana numela 'ida sawa, nate 'ebweu tai 'ana numela, sikisi analedi be sikisiti sikisi (666).

To'etoseyana 'ina tomotaiyao 'idi wali

14 ¹^eTa yadunedune, ga lami ya'itena 'oya Sayoni debanaya 'itootoolo, ta wate tomota wani analedi be potipowa tausani ma'enao simiyami, taudi nate 'ana esana be wate Tamana 'ana esana debadiya si'etoladidi. ²^f'Enega galewega 'enana 'ebweu yanonona 'atuwa bwasi daudauna, ta wate 'atuwa wepalala 'enana. Ta 'enana nina yanonona 'atuwa tomota ma idi 'ebe gwanegwane siguiguinuwa, 'adi nono bobo'ana.

³^gTa tomotai nidi 'ebemi esaesa matanaya sitoolo, be wate yobai nidi ata, ta wate 'inapwanao nidi, matadiya sitoolo, ga wali auwauna siwaliyena. Ta wali nina nigeya 'ebweu yaita sawesawenaya be 'imwalatoni, nate namo taudi boda nidi wani analedi be potipowa tausani sawesawediya, taudi me bale'u, ta Yaubada 'igimwanedi ga 'i'etoseyedi.

⁴^hTa taudi tai nidi getedi nigeya siloeloegesi iine ma'ediyao, manuna taudi nuwenuwe boladi tuga, ta esi Lami simuliya 'ai'ailina, 'abo mwa'o

^c 13:13-14 Md 24:24 ^d 13:17 Et 14:9-11 ^e 14:1 Et 3:12 ^f 14:2 Et 1:15 ^g 14:3 Et 7:4

^h 14:4 Ye 1:18

nai 'itatauya. Taudi ni'atu Yaubada 'igimi sa'ugagidi tomota 'ediyega, nate Yaubada be Lami 'idi gimisesoi. ⁵Taudi nigeya 'ebweu wate kabo 'ediya, ta nigeya 'ebweu wate 'idi to'umalinamo.

Anilose 'etoi 'idi ale

⁶'Enega wate 'ebweu anilose ya'itenan etanega 'itaetaeya, ta tetela bobo'ana ta miyamiya atayana 'ime'ena be 'ida simana me bale'u yauyaudi 'ediya, nate 'ebeloinao be susu be boda 'ebweuna 'ebweuna 'enaya. ⁷Ta anilose nina 'enana sinabwanega 'igwae,

"Yaubada 'ena wada 'amayaba be wada lotuputupu, manuna 'ina tuta bwa'omatana ni'atu 'iapwesama, 'enega tauna galewa be bale'u be ola ta wate bwasi daudaudi 'adi tomweluluwa matanaya wa'aetulasa be wabwagobwago."

⁸ⁱTa anilose 'eluwena 'imuliyena ga 'ibwau, 'igwae,

"Asa sinabwana Babiloni ni'atu 'ibe'u saba. Asa nina 'ina bubunega boda yauyaudi 'ienumedi, bubuna nina nate bwala 'ana yala bubuna to'umalina manuna."

⁹^jAnilose 'eluwa nidi mulidiyega 'ebweu wate 'imuliyedima, ga anilose nina tauna wate 'ibwau, 'igwae,

"Abo yaisigedi yobai nina be 'ina tokwalui 'ediya sibwagobwago, ta 'adi we'iwe'iyaya debadiya nai nimadiya, ¹⁰taudi Yaubada 'ina oine waiwaina 'enega sinunuma, ta oine nina nate Yaubada 'ina gamwasowala 'ai'aila ni'atu 'isiwena gamwasowala keigana 'enaya. Ta wate

kaiwe yaiyai be gulewa yaiyaidi tomota nidi bwaladiya sida lotoona, Yaubada 'ina aniloseyao be Lami matadiya. ¹¹Ta kaiwe nina 'asuna 'itu'etu'e ataya, ta nigeya 'ina 'lebe gumwalamo. Ta tomota nidi taudi yobai nina ma ina tokwalui 'adi tobwagobwagoyao, ta 'ana esana dayadayagina 'ana to'ewao, taudi 'idi 'elouya nigeya 'ida gumwala 'asiyata nai boiboi 'ediya."

¹²^kOna gete 'enega Yaubada 'ina tomotaiyao sida 'alama'il'ita, taudi 'ina loina 'ana toematamatanao ta Yesu 'ana toemisao.

¹³^l'Enega galewega 'enana yanonona 'igwae, "Gete 'u'etoladi 'aene taudi 'ida 'Inapwana 'ana toemisao, 'abo ma'etamo simwamwawasa, sida gwausowala tuga."

Ta Yaluyaluwa Tabuna wate 'igwae, "Ona'ai'aila, sida gwausowala, manuna sida eyawai'ata 'idi gwaunuwa 'enega, be 'ana e'isa sida loba."

Bale'u 'ana sesoi

¹⁴^m'Enega yadunedune ga pwana wakewakekena ya'itenan, ta pwana nina 'enaya 'ebweu 'atuwa tai ya'itenan 'imiyatowa, ta debanaya 'ana peyaula esaesa goula, ta nimanaya ma ina naipi mamatana bwagebwagetonan.

^j 14:8 Et 18:2-3 ^j 14:9-10 Et 13:11-17, 19:20, 20:10, 15, 21:8 ^k 14:12 Et 13:10

^l 14:13 Ib 4:10 ^m 14:14 Et 1:13

¹⁵"Ta 'ebweu wate anilose Anuwa Tabuyega 'iapwesama, ta wate 'ibwautu'le 'Inapwana nina pwana debanaya ma ina naipi 'enaya, 'igwae, "'Imu naipiyega 'uda sesoi, manuna bale'uya tuta sesoi ni'atu 'iapwesa, ta ni'atu masula 'imatuwa." ¹⁶Ta 'enega tai nina pwana debanaya 'ina naipi 'italaena ga bale'u 'ina sesoi 'iegogonedi.

¹⁷Ta 'ebweu wate anilose Anuwa Tabu galewaya 'enega 'iapwesama, tauna wate naipi matatana nimanaya.

¹⁸'Enega 'ebweu wate anilose 'ebe taliya 'enega 'imai, tauna 'awe 'ala'alata 'ana tololina, ga 'enana sinabwanega 'ibwau anilose nina ma ina naipi 'enaya, 'igwae, "'Imu naipiyega 'uda tala be oine uwanao bale'uya 'usesonidi, manuna ni'atu sibweyalidi."

¹⁹^o'Enega anilose nina 'ina naipiyega oine uwadi bale'uya 'i'upwedi, ta oine nidi 'ebeida sinabwana solanaya 'iuledi. 'Ebeida nina nate Yaubada 'ina gamwasowala. ²⁰Ta oine nidi maibo'adi 'iidedi, 'ebeida 'enaya, nate 'asa sinabwana 'etaulunaya, ga lala 'idaudau 'ebeida nina solanega, 'atuwa muluwa 'ana dudula tu analedi kilomita nadigega, ta 'ina ni'u 'ana tu'e nadigega bale'uyega be osi tootoolona 'otona 'enaya.

Edeedeede to'umalidi

15 ^{1p}'Enega 'ebweu wate 'ebe nuwaowana sinabwana galewaya ya'itena, nate anilose sebeni, ma idi edeedede to'umalidi 'adi yau sebeni. Ta mwau nidi sebeni nate Yaubada 'ina gamwasowala 'ana 'ebe losalowa.

²Ta wate ya'itena 'atuwa ola 'ina siwalowa ta wate sabesabeluluna, ta ola nina tupitupinaya boda sitootoolo, taudi ni'atu siewaiwai yobai to'umalina be 'ina tokwalui be wate 'ana esana 'ana numela 'ediyega. Ta boda nidi nimadiya 'ebe gwanegwaneyao Yaubada 'enega, ³^qga maibo'adi Mosese walina siwaliwaliye, tauna Yaubada 'ina toguinuwa, ta wate Lami walina siwaliwaliye, sigwae,

"Inapwana Yaubada Toewaiwai sayo, 'imu guinuwao sinabwadi ta 'ebe nuwaowanao, ta 'imu bubuna maibo'ana bobo'adi ta palupaludi, ta wate 'ebeloina maibo'adi 'uloiloinedi.

⁴"Inapwana ye, tomota maibo'adi sida 'amayabeyo ta sida 'awa eseeseyo, manuna tebweuuyo 'esaseyo, 'enega me bale'u maibo'adi sida mai be matamuya sibwagobwago, manuna tomota maibo'adi 'imu loinao palupaludi ni'atu si'itedi."

⁵"Enega yadunedune ga ya'itena galewaya Yaubada 'ina anuwa 'i'egegena, anuwa nina solanaya 'ina onaupaupa 'eto'etoladina 'imiyami.

⁶Ga Anuwa Tabu nina 'enega anilose sebeni siapwesama ta 'elouyao

ⁿ 14:15, 18 Md 13:36-40 ^o 14:19 Et 19:15 ^p 15:1 Et 15:6-7 ^q 15:3 2 Loi 32:3-4; Et 16:7

^r 15:5 Ib 9:3

sebeni nimadiya. Anilose nidi 'adi 'oamao wakewakekedi ta 'esasedi, ta 'adi diyapwata goula lumalumadiya simiyami.

⁷'Enega yobai nidi ata 'ediyega 'ebweuna yobai keiga goula sebeni 'i'ewedidi, ga anilose nidi sebeni 'i'ebwa'edi, ta keiga nidi soladiya Yaubada miyamiya atayana 'ina gamwasowala 'enega 'iloemaedi.

⁸Gote 'ena Anuwa Tabu solana 'imaa Yaubada Toewaiwai sana 'ina esaesa 'enega, 'ana 'ita 'atuwa bwawa nadigega, ta nigeya 'ebweu yaita sawesawenaya be Anuwa Tabu 'ena 'ilulugu, 'ana laba anilose nidi sebeni 'idi guinuwa mwauyao sebeni sida losalonidi.

Yaubada 'ina gamwasowala keiganao sebeni

16 ¹"Ta Anuwa Tabu solanega 'ebweu 'enana sinabwana yanonona, 'ionaona anilose nidi sebeni 'ediy, 'igwae, "Watatauya bale'uya be Yaubada 'ina gamwasowala keiganao sebeni wada siwadi."

²"Enega anilose nuganuganina 'itauya ga 'ina keiga bale'uya 'isiwena, ga bonu to'umali 'ai'ailidi ta uyauyadi siapwesa taudi yobai nina 'ina tokwalui 'ana tobwagobwgoyao 'ediy, taudi nate yobai nina 'ana we'iwe'iyaya 'ediy 'imiyami.

³"Ta anilose 'eluwena wate 'ina keiga 'i'ewena ga olaya 'isiwena, ga ola nina maibo'ana 'ielala, 'ana 'ita 'atuwa tomwawasa 'ebweu lalana. 'Enega yage maibo'adi mayawasidi ni'uya simwawasa.

⁴Ga anilose 'etonina wate 'ina keiga 'i'ewena ga bwasi daudaudi be wewelupwa 'ediy 'isiwena, ga wate sielala.

⁵"Enega anilose nina tauna bwasi 'ana toloina 'enana yanonona, 'igwae, "Yaubada ye, 'oyo tuta lowa ta tuta gete 'ediy 'umiyamiya, ta wate palupaluyo ta 'esaseyo. 'Imu loina gete palupalu wawasae, manuna tomota nidi to'umalidi, ⁶"ga Yaubada 'ina tomotaiyao be wate 'ina palopitao siunudi ga laladi sigiedauna. 'Enega 'adi e'isa ni'atu 'u'ebwa'edi be 'aene lala sida numa, ga e'isa nina nate 'ilobwene 'ai'ailidi."

⁷"Ta 'enana 'ebweuna wate yanonona 'ebe taliya 'enega, 'igwae, "'Inapwana ye, 'oyo Yaubada Toewaiwai sayo, 'imu loina gete bobo'adi ta palupaludi."

⁸'Enega anilose eatana 'ina keiga 'i'ewena ga sinala 'ena 'isiwena, ga sinala 'ina waiwai 'iloeposeyanena ga sawesawenaya be tomota 'i' alasidi.

⁹"Ga ni'atu yaiyai nina sinabwana tomota 'i' alasidi, 'enega Yaubada si'awa to'umaliyena, manuna tauna 'ina loinega ga mwau nidi siapwesama. Ta tuwa tuga, nigeya sinuwanuwa 'ebuni be 'aene Yaubada sida tupu.

^s 16:1 Et 16:17; Sep 3:8 ^t 16:2 Sia 9:10; Et 13:11-17 ^u 16:3 Sia 7:17-21 ^v 16:6 Et 17:6, 18:24 ^w 16:7 Et 19:2 ^x 16:9 Et 9:20-21

¹⁰^y'Enega anilose enimana wate 'ina keiga 'isiwena yobai nina bweyabwetalina 'ina 'ebemi esaesa 'ena, ga 'ina 'ebeloina maibo'ana 'iguguyoi. Ga tomota uya nina 'enega siesala'l'ita. ¹¹Ta Yaubada galewaya si'awa to'umaliyena, bonu nidi uyauyadi manudi, ta nigeya sali sida nuwa'ebuni 'idi guinuwa to'umalidi 'ediye.

¹²'Enega anilose esikisina 'ina keiga 'i'ewena ga bwasi sinabwana 'ana esana Yupeletisi 'ena 'isiwena, ga bwasi nina maibo'ana 'iyapasa, be 'enega 'aina kiniyao bolimana 'enega sida abalama.

¹³Ta yaluyaluwa bil'i 'etoi, 'adi 'ita 'atuwa kwekwe, ya'itedi siapweapwesama yobai nina bweyabwetalina 'awanega, be wate yobai nina olega ta wate 'ina palopita kabokabo nina 'awadiyega. ¹⁴^zYaluyaluwa 'etoi nidi nate Taumudumudulele na 'ali'eiyao, taudi 'ebe nuwaowanao siguinuwedi, ga taudi getedi sitauya ga kiniyao bale'u maibo'ana 'enaya, 'aene 'idi bodao sida egogonedima be taudimo 'ediya sida losaiya, nate Yaubada Toewaiwai sana 'ina 'asiyata 'ebe losalowa 'enaya.

¹⁵^a"Wada enono 'ai'aila, manuna 'etamo 'igu mai 'atuwa to'ipwala 'idi mai nadigega, ta 'abo yaita 'oyo 'ulomata'l'ita 'ai'aila be 'amu 'oama

'u'ita'l'isi, 'uda gwausowala, manuna geya'abo ma imu omayamaya tomota gamwagamwanidiya bubugewa manuna."

¹⁶'Enega yaluyaluwa nidi kiniyao ma idi bodao siegogonedima 'ebweu esena, 'ena Ibeliuyega sigwae "Amagedoni", 'enaya.

^{17^b}Ta anilose eseabenina wate 'ina keiga 'i'ewena ga mwatui daita etanaya 'isiwena, ga 'ebemi esaesa Anuwa Tabu solanega 'ebweu 'enana sinabwana 'iapwesa, 'igwae, "Ni'atu." ^{18^c}Ga gote 'ena namala be dudu be wepalala be wate mwani'ini'i sinabwadi siapwesa. Lowaenei ga batuwa tomota 'idi tuta 'ena, nigeya 'ebweu mwani'ini'i 'ana sinabwa gote nadigega 'iapweapwesa'esa. Ta gete ona'ai'aila to'umali wawasae. ^{19^d}'Enega 'asa sinabwana nina 'ieweyalina, ga 'ana weyalao 'etoi siapwesa. Ga sena maibo'ana 'ediya mwani'ini'i nina 'idi 'asao 'igieto'umaliyedi, ta 'asa sinabwana 'ana esana Babiloni 'ina to'umalina Yaubada 'inuwa'l'isina, ga 'ina keiga 'enega oine 'ienumena, ta oine nina nate 'ina gamwasowala sinabwana oinen. ²⁰Ta wate saluyao be 'oya maibo'adi sisawala, ga nigeya wate sawesawenaya be taloba limadi. ^{21^e}Ta wate 'usana sinabwadi ta pulipulidi, nadigega gulewa sinabwadi galewega sisagusaguma tomota 'ediya. 'Enega tomota nidi Yaubada si'awa to'umaliyena 'usana nina to'umali wawasae manuna.

Waine tosogala diidiga

17 ¹'Enega anilose nidi sebeni ma idi keiga sebeni Yaubada 'i'ebwa'ediya, 'ebweuna 'ediye 'imai ga 'ieonegu, 'igwae,

^y 16:10 Sia 10:22 ^z 16:14 1 Ti 4:1; Et 19:19 ^a 16:15 1 Te 5:2; Et 3:3; Lu 12:37-40

^b 16:17 Et 16:1 ^c 16:18 Et 8:5 ^d 16:19 Et 14:8-10 ^e 16:21 Sia 9:24; Et 16:9, 11

^f"Umai be yada e'itayo Yaubada 'ina bwa'omatana tosogala 'ai'aila mewainena 'enaya, ta tosogala nina 'ana mwalatoi nate 'asa sinabwana bwasi yauyaudi tupitupidiya si'abina. ²^gTa bale'u 'ana kiniyao loelata 'ena siewaiwai tosogala nina ma'ediya, ga 'enega me bale'u yaudi loelata bubunina sinumena ga siekabaleya."

³^gGa Yaluyaluwa Tabuna 'enega yalotoogu 'atuwa anilose nina 'i'au'ewegu sena mwatui daitaya, ga waine 'ebweuna ya'iten a yobai bweyabweyalina 'igeluna, ta yobai nina bwalana maibo'ana 'enaya esana to'umalidi si'etoladidi, ta bulubuluna 'adi yau sebeni, be kunanao 'adi yau sanau.

⁴Ta waine nina 'ana 'oama 'ina bweyabweyala 'atuwa toesaesao 'adi 'oama, ta 'ana iyaiyalao goula be gulewa esaesadi be pakuyao, ta nimanaya keiga goula 'igiyaina, ni'atu 'iloemaena bubuna to'umalina 'enega, loelata manuna. ⁵Ta debanaya 'ana esana si'etoladina, 'ana kunuwadawada, 'igwae,

"Babiloni sinabwana, nate tosogalao be toloelata gadiluluyao sinadiya."

⁶^hTa waine nina ya'iten a, ni'atu Yaubada 'ina tomotaiyao be Yesu 'ana tosimanao laladi 'inumena, ga 'enega 'iekabaleya, ga nuwagu 'iowana waine nina 'ana 'ita manuna.

⁷Ta 'enega anilose 'ieonegu, 'igwae, "Geya'abo nuwayo 'iowaowana. Yada li'ami 'emuya to'ase waine nina ta yobai nina 'igelunaya, tauna bulubuluna sebeni be kunanao sanau, 'adi mwalatoi. ⁸ⁱYobai nina 'u'iten a lowa mayawasina ta ni'atu 'imwawasa, be ma'etamo 'iapwesama gaula nina sinabwana 'enega be 'itatauya, be 'enega sigieto'umali 'ai'aili. Ta tomota me bale'u, yaisigedi taudi 'adi esana Yaubada nigeya 'i'eto'etoladidi yawasi bukina solanaya, tutu nina bale'u 'ana mweluluwa'unu 'enaya, taudi yobai nina 'etamo sida 'ita be nuwadi 'iowana, manuna lowa mayawasina ta gete tugai ni'atu 'imwawasa, ta ma'etamo 'iapwesa limanama.

⁹"Abo sinasinapu 'emuya, 'uda mwalatoni 'aene bulubulu nidi sebeni nate 'oya 'adi yau sebeni, 'oya nidi 'ediya waine nina 'imiyatowa, ta 'ana mwalatoi wate kiniyao site sebeni, ¹⁰ta nima 'ediyega ni'atu sibe'u, ga 'ebweuna 'etamo 'iloiloina, ta 'ebweuna ma'etamo 'ida apwesa be 'ina tutu kukupana namo 'ida miyami.

¹¹Ta kiniyao nidi sebeni, 'ebweu wate kini ma'edi, 'idi boda solanaya, tauna yobai nina lowa mayawasina ta yawasina 'igumwala, be ma'etamo 'itatauya be 'aene sida gieto'umali 'ai'aili.

¹²"Ta kuna nidi sanau 'u'itediya, nate kini 'adi yau sanau, taudi nigeya sie'ae'ale be siloina, ta ma'etamo sida loina tutu kukupana namo 'enaya, yobai nina ma'ediya.

^f 17:2 Et 18:3 ^g 17:3 Et 13:1 ^h 17:6 Et 18:24 ⁱ 17:8 Et 13:8

¹³ "Taudi site sanaau nidi 'idi nuwanuwa leleleya, nuwanuwadi be 'idi waiwai ta 'idi loina sida tagwaledi yobai nina 'enaya. ¹⁴^jBe 'enega Lami 'enaya sida losaiya, ta Lami nina 'ida ewaiwai sinedi, manuna tauna 'inapwanaao 'idi 'inapwana, ta kiniyao 'idi kini, ta wate taudi 'ina esinuwega 'ibwauyedima, taudi 'ana tomuliya 'ai'ailao ma'enao."

¹⁵ 'Enega anilose 'eguya wate 'iona, "Bwasi nidi ni'atu 'u'itediya, ta 'ediyawaine tosogala nina 'imiyatowa, 'adi mwataloitoiyo nate bodoa be pwalyao be susuyao be 'enanao. ¹⁶^kTa kuna sanaau be yobai nina 'u'itedi taudi ma'etamo tosogala sietalauwale, be 'ina gwegweyao maibo'adi si'ewadi be kakaena 'ida miyami, be wate esiyona si'a'ani, ta lulunao kaiweyega sigabu. ¹⁷Manuna Yaubada ni'atu 'atediya 'ienuwa sa'uyedi be 'ina nuwanuwa sida guinuwe, nate 'idi guinuwa leleleya be 'idi waiwai ta 'idi loina yobai nina si'ebwa'ena, be tauna 'ida loina 'ana laba Yaubada 'ina onao nidi 'iguinuwedi.

¹⁸ "Ta waine nina 'u'iten, tauna 'asa sinabwana, ta 'iloiloina bale'u 'ana kiniyao maibo'adi 'ediy."

'Asa Babiloni 'ina be'u

18 ¹Ta wate 'ebweu anilose ya'iten a galewega 'imwa'umwa'utama, tauna ma ina loina sinabwana, ta wate 'ina maedanega bale'u maibo'ana 'ituyayalina, ² ga 'enana sinabwanega 'ibwau, "Asa sinabwana nina Babiloni ni'atu 'ibe'u saba, ga tonitonibwa'a ta yaluyaluwa bi'iyao ta wate manuwa to'umalidi be gadiluludi sie'asaena. ³ Manuna Babiloni 'ina oinega boda yauyaudi 'ienumedi, oine nina nate loelata to'umalina. Tauna 'atuwa tosogala. 'Enega bale'u 'ana kiniyao ma'ledi siloegesi, ta 'ina loegesi nidi 'ediyega toeusanaao 'idi esaesa sinabwana silobaloba."

⁴^l'Enega galewega wate 'ebweu 'enana yanonona, 'igwae, "Igu tomotaiyao 'asa nate solanega waapwesama, 'abona nai 'ina to'umalina 'emiya 'iabala be 'ana e'isa to'umalina waloba. ⁵ Manuna 'ina to'umalina 'ana sinabwa 'atuwa nadigega galewa 'ina tu'e, ta 'ina bubuna to'umalidi nidi getedi manudi Yaubada 'inuwanuwa be 'aene 'ida e'isa."

⁶^mTa wate anilose nina 'igwae, "Asa gote 'uda e'isa, nadigega tuga to'ase 'ina guinuwa, be 'uda e'isa maluwa. Be wate tauna 'ina oine to'umalina maluwa 'u'ebwa'e, be tauna 'inuma. ⁷Ta wate 'ina ona gagasa be 'ina sogala 'adi e'isa 'uda 'ebwa'e, uya be dedoi, manuna taunamo 'ena 'igwae, 'Abo'agu kuwini, nigeya wate kwabula 'ina sena 'ena yamiyami, ta wate geya'abo dedoi yalobaloba.' ⁸ⁿ'Enega 'asiyata 'ebweu 'ena mwau nidi getedi 'enaya sida apwesa, nate le'oasa be dedoi be botana, be wate kaiwe sabelulu 'ida 'alasi. Manuna 'Inapwana tauna Yaubada Toewaiwai sana waine nina 'ana e'isa 'ida 'ebwa'e."

^j 17:14 Et 19:11-16, 19-20 ^k 17:16 Et 18:8 ^l 18:4 2 Ko 6:17 ^m 18:6 2 Te 1:6

ⁿ 18:8 Et 11:17-18

⁹°Ta bale'u 'ana kiniyao, taudi waine nina ma'ediyia siloyaweya ga simiya sogalaya, taudi wate 'asa nina manuna sidoonaona, be sidedo 'abo 'asa 'i'al'a'lasi, ta 'asuna si'ita. ¹⁰Ta ma idi matauta 'ina 'elouya manuna, 'enega 'edasolaya sitoolo ta sigwae, "Oioi, oioi, 'asa sinabwana ta waiwaina Babiloni ni'atu 'ana loina 'iloba maninina."

¹¹Ta wate bale'uya toeusanao ma idi nuwamwau ga 'asa nina manuna sidedoi, manuna nigeya sa'l 'ebweu wate yaita be 'idi gwegwe nidi 'ida gimwanedi. ¹²'Idi gwegwe nidi nate nadigega goula, be siliba, be gulewa esaesa, be paku, be 'oama wakewakekedu, be 'oama esaesa yomwayomwalidi, be kaiwe maimaidi, be dona sinabwadi, be kaiwe bobo'adi nadigega gai, be kopa kainumu, be gulewa wakewakekedu, ¹³be 'ane, be mwadi, be gala'u, be bunama, be gweda bobo'adi, be oine, be bunama olibe, be witi, be bulumakau, be pipi, be osi, be wagalisilisi, ta wate tomota mayawasidi be mayaluyaluwadi sida egimwaneyedi be 'aene 'idi topaisewao.

¹⁴'Enega toeusanao nidi sida ona 'asa nina 'enaya be sida gxae, "Yage nidi bobo'adi nuwanuwayo ni'atu sisawala, ta wate 'imu esaesa be 'amu tupu maibo'ana 'igumwala, ta geya'abo wate 'ullobaloba limadi."

¹⁵Ta toeusanao, taudi 'idi esaesa sinabwadi 'asa nina 'eneba silobenaya, sida toolo 'edasolaya, manuna 'asa nina 'ina 'elouya si'itenia ga simatauta, ga ma idi 'ateuyauya sidedoi, ¹⁶sigwae, "Oioi, oioi, 'asa gote sinabwana lowa 'ieiyala kaleko esaesa, be 'oama wakewakekedu be bwewabwyalidi, be goula, be gulewa esaesa, be paku 'ediyega, ¹⁷ga tuta gidalina namo 'ena ga 'ina esaesa nidi ni'atu sisawala."

Ta wate taudi toniwaga, be 'idi to'adau maibo'adi, be bwagabwaga 'ana topaisewao yauyaudi, 'edasolega sida toolo, ¹⁸ta 'asa nina 'asuna sida 'ita be sida bwau, "Lowa nigeya 'ebweu 'asa 'ana 'ita nadigega 'asa gete sinabwana, ta gete tuga mwa'adega?"

¹⁹'Enega taudi debadi sida kwausidi be sidedoi sinabwana, sigwae, "Oioi, oioi, 'asa gote sinabwana 'eneba to'adauyao 'idi esaesa silobeduya, ta tuta kukupana namo 'enaya esaesa maibo'ana ni'atu 'isawala.

²⁰P "Wada gwausowala galewaya 'omi Yaubada 'ina tomotaiyao, be wate palopitao, be 'ana tosimanao ma'emyao wada gwausowala, manuna lowa 'imi 'elouya 'asa nina 'eneba walobena, ta gete tuga Yaubada sa'i 'elouya 'eneba 'ie'isedi."

²¹'Enega 'ebweu anilose toewaiwai gulewa sinabwa wawasae 'igilagasina ga olaya 'iula mwa'utena, 'igwae, "Asa nina sinabwana Babiloni 'ibebe'u gulewa gete nadigega, be geya'abo wate 'itenamo.

²²"'Enega 'asa nina 'ina gwausowala 'igugumwala, be geya'abo 'ebweu wate 'ebe gwanegwane 'anaunuwa, nai yoguli 'ana mu'e, siapweapwesa.

"Ta wate paisewa 'adi tosinapuyao geya'abo wate simiyami, ta wate sabutu 'ana nono 'igugumwala 'enaya.

²³ "Enega mayale 'idi maedana 'enaya geya'abo siapweapwesa. Ta wate geya'abo toaiyao 'enadi 'asa nina 'enega sinoono.

"Ona'ai'aila, bale'u maibo'ana 'enega 'asa nina 'ana toesaesao siloetana wawasae, ga 'idi nabwasuwa 'ediyega mali sena tomoteninao sikaboedi.

²⁴ "Ta wate lowa tomota yaudi nadigega palopitao be Yaubada 'ina tomotaiyao, siloemwawasidi 'asa nina 'enaya."

19 ¹ Ga muliyega galala sinabwana galewega yanonona 'atuwa pwalu sinabwana 'enadi, sigwaegwae,

"Yaubada tada tupui, tauna To'etoseyana ta Toesaesa ta Toewaiwai sana. ² Ta 'ina loina maibo'ana palupaluna ta bobo'ana, manuna tosogala diidiga nina 'ina sogalega bale'u maibo'ana 'igie to'umaliyenaya, ni'atu 'ana e'isa 'ilobena. Ta wate 'asa nina 'ena Yaubada 'ina tomotaiyao siloemwawasidi, 'enega 'igieto'umaliyena."

³ Ta wate sibwau, sigwae, "Yaubada tada tupui, manuna 'asa nina sinabwana 'i'alalasi, ta 'asuna tuta maibo'ana 'itu'etu'e."

⁴ ^{s1} Enega 'inapwanao nidi site tuweniti powa be wate yobai nidi site ata sibe'u sanamwa'uta tauna Yaubada nina 'ebemi esaesa 'ena 'imiyatowa matanaya, ga 'ena sigwae, "Nadigega. 'Atupuyo!"

Lami nina 'ina ai sagalina

⁵ Enega 'ebemi esaesa nina 'enega 'ebweu 'enana 'imai ga 'igwae,

"Omi Yaubada 'ina toguinuwao be 'ana to'amayabao, gidalimi be sinabwami, wada lotuputupu 'enaya."

⁶ Ta wate yanonona 'atuwa boda sinabwana 'enadi, ta wate 'atuwa bwasi daudauna 'enana, ta wate 'atuwa wepalala 'enana, sigwaegwae,

"Yaubada wada tupui, manuna tauna 'ida 'Inapwana Toewaiwai sana, ga ni'atu 'ietoloina. ⁷ Tada gwausowala be tada uyawana 'ai'aila ta wate tada 'awabobo'ane, Lami 'ina ai manuna, ta mwanena ni'atu 'ieiyalina 'idi ai manuna, ⁸ ta waine nina ni'atu 'ana 'oama wakewakekena ta 'esasena Yaubada 'i'ebwa'ena."

Ta 'oama nina 'ana mwalatoi nate Yaubada 'ina tomotaiyao 'idi bubuna palupaluna.

⁹ ^{w1} Enega anilose nina 'eguya 'igwae, "Ona gete 'uda 'etoladi 'aene 'Yaisigedi 'omi Yaubada 'ibwauyemi Lami nina 'ina ai sagalina 'enaya, wada gwausowala."

Ta wate anilose nina 'iona limana, ta 'igwae, "Gete Yaubada 'ina ona 'ai'aila."

¹⁰ ^{x1} Ta 'aenaya yabe'u sanamwa'uta ga yabwagobwago 'enaya, ta 'enega 'igwae, "Geya'abo nadigega. 'Abo'agu tuga Yesu 'ina toguinuwa, 'oyo

^q 19:2 Et 6:10 ^r 19:3 Et 14:11 ^s 19:4 Et 4:9-11 ^t 19:6 Et 11:15-18, 14:2-3

^u 19:7 Et 21:2, 9; Ep 5:32 ^v 19:8 Ais 61:10 ^w 19:9 Lu 14:15 ^x 19:10 Et 22:8-9

nadigega, ta wate nadigega tasimwao taudi Yesu 'ana tosimanao, Yaubada esi 'ena 'uda bwagobwago." Manuna Yesu 'ana tosimanao 'adi lotoona nadigega palopitao 'adi lotoona Yaubada yaluyaluwana 'enega.

Osi wakewakekena be 'ana togelu

¹¹ Ta galewa ya'itenia 'i'egegena, ta 'enaya osi wakewakekena, ta 'ana togelu nina sieesena Togwaunuwa palupaluna. Ga 'ina loina palupaluna 'enega 'ibwa'omatana, ta wate 'ilosalosaia. ¹²^a Ta matana 'adi 'ita 'atuwa kaiwe sabesabeluluna, ta debanaya 'ana peyaula esaesao yaudi simiyami. Ta wate 'ana esana si'etoladina nigeya sawesawenaya be yaita 'imwalatoni. Taunamo tuga 'imwalamwalatoni. ¹³^b Ta 'ana 'oama nina 'i'otenaya, lala 'enega 'iepwasena, ta 'ana esana sieesena, sigwae, "Yaubada 'ina Ona."

¹⁴ Ta galewa 'ana tolosaiyao 'idi osi wate wakewakekedi sigeludi, ga simuliyyena, ma 'adi 'oama wakewakekedi, ta 'esasedi. ¹⁵^c Ta 'idi toanugana nina 'awanega sisaisiya mamatana 'iapweapwesa, tauna 'etamo sisaisiya nina 'eneba sena yauyaudi 'iewawai sinedi be 'ediyia 'ida loina pa'alala, be wate oine 'ebeida 'ena 'ida idadi, nate Yaubada Toewaiwai sana 'ina gamwasowala sinabwana. ¹⁶^b Ta 'ana 'oama 'ena be wate 'aenaya 'ana esana si'etoladina, sigwae, "Tai gete tolinoao 'idi tolinoaa, ta wate 'inapwanao 'idi 'inapwana."

¹⁷^d Enega 'ebweu anilose ya'itenia sinala 'ena 'itoootoolo ga 'ibwau manuwao maibo'adi mwatuiya sitaetaeya 'ediyia, 'igwae, "Wadelima Yaubada 'ina sagali sinabwana 'enaya, ¹⁸^e be 'enega wa'a 'inapwanao esiyodi, be saiya 'adi toanuganao esiyodi, be tolosaiyao esiyodi, ta wate osiyao be 'adi togeluyao esiyodi, be wate tomota yauyaudi esiyodi, taudi 'inapwanao be 'idi toguinuwao wate, sinabwadi be gidalidi."

¹⁹^c Enega yobai nina olega 'imai, ta wate bale'u 'ana 'inapwanao ma idi tolosaiyao, ya'itedi siegogona sabi losaiya osi 'ana togelu nina ma ina tolosaiyao 'ediyia.

²⁰^d Gote 'ena yobai nina ma ina palopita kabokabo sigiyaidi, ga mayawasidi siuledi yaiyai sinabwana solanaya. Palopita kabokabo nina tauna lowa 'ina guinuwa waiwaidi 'iguinuwedi yobai nina matanaya ga 'ediyega tomota 'ikaboediya, taudi yobai nina 'ana we'iwe'iyaya 'ediyia 'imiyami, ta 'ina tokwalui nina 'ana tobwagobwagoyao.

²¹^e Ta sisaisiya osi nina 'ana togelu 'awanega 'iapweapwesa, 'enega yobai nina be 'ina palopita kabokabo 'idi tolosaiyao 'iloemwawasidi. 'Enega manuwa yaudi simai ga kokowadi si'enidi, ga gamwadi 'ipawa.

^y 19:12 Et 1:14 ^z 19:13 Yo 1:1, 14 ^a 19:15 Et 1:16 ^b 19:16 Et 17:14 ^c 19:19 Sam 2:2
^d 19:20 Et 13:11-17, 20:10 ^e 19:21 Et 19:17-18

Yakwala tausani

20 ^{1f}'Enega 'ebweu wate anilose ya'itena galewega
 'imwa'umwa'utama, ta gaula nina sinabwana 'ana 'ebe gigege
 be balae 'i'ewedi, ga 'imai, ^{2g}ga 'igiyaina yobai nina bweyabwetalina,
 tauna gimimwata ta Taumudumudulele nina, nate Seitani, ga 'iyonina be
 'ana laba tausani yakwala sigugumwala. ³'Enega anilose nina yobai nina
 'igilagasina, ga 'iulena gaula nina sinabwana solanaya, ga nada 'igibodena,
 ga 'igiepa'alina, be geya'abo boda 'ikabokaboedi 'ana laba yakwala tausani
 sigugumwala, be mulinaya 'ili'ami tuta gidalina namo manuna.

^{4h}Ta wate 'aina 'ebemi esaesa ya'itedi, ga 'ediya taudi Yaubada
 loina 'i'ebwa'ediya simiyatowa. Ta wate tomota nidi 'otodi si'upwedi,
 manuna taudi Yesu 'ana tosimanao ta Yaubada 'ina ona 'ana tosimanao,
 yaluyaluwadi ya'itedi, taudi nigeya yobai nina be 'ina tokwalui 'ediya sida
 bwagobwago, ta nigeya wate 'ana we'iwe'iyaya debadiya be nimadiya
 sisau'sa'udi. Taudi getedi mwawasega ni'atu sitoolo, ta Keliso ma'edi
 siloiloina yakwala tausani 'ediya, ⁵taudi togimitoolo, ta tomawasa yaudi
 yakwala tausani sigugumwala be 'enega taudi wate sida toololimana.

⁶ⁱTa taudi togimitoolo 'esasedi, 'enega ma idi gausowala, ga
 mwawasa 'eluwena geya'abo silobaloba, ta taudi sa'i Yaubada be Keliso
 'idi totaliyao, be Keliso ma'edi sida etoloina yakwala tausani 'ediya.

Seitani 'ina neneta

⁷'Enega yakwala tausani 'ida gumwala, be Seitani 'ebeyonega sida
 li'ami, be 'ida apwesama, ⁸be 'ida tauya bale'u maibo'ana 'ediya sabi
 kaboeni, sena nina nadigega Gogi be Megogi 'ediya. 'Enega Seitani taudi
 maibo'adi 'ida egogonedi saiya manuna, 'adi yau sawayogena, nadigega
 kaukau le'awayaya. ⁹'Enega bale'u maibo'ana siataonedima, be Yaubada
 'ina 'asa nina sinabwana 'ena siapwesa, ta Yaubada 'ina toemisa
 nidi siasakowasiyedi, ta 'awesabelulu galewega 'imwa'utama ga 'i'ala
 egumwalidi. ^{10j}'Enega 'adi tokabo Seitani nina, si'ewena ga siulena
 yaiyai sinabwana solanaya, lowa 'ena yobai nina be palopita kabokabo
 nina siuledi, be sena nina 'ena si'elo'elouya 'asiyata be boiboi 'ediya, ta
 geya'abo 'igumwagumwala.

Bwa'omatana 'ana 'ebe losalowa

¹¹'Enega 'ebweu 'ebemi esaesa wakewakekena ta sinabwana, be 'ana
 tomiya nina, ya'itena. Ga matanega galewa be bale'u sisawala, be nigeya
 sawesawenaya taloba limadi.

^f 20:1 Et 9:1 ^g 20:2-3 Et 12:9; Yu 1:6 ^h 20:4 1 Ko 6:2; Et 6:9, 13:16-17; Dan 7:27

ⁱ 20:6 Et 2:11; 1 Pi 2:9 ^j 20:10 Et 19:20, 21:8; Md 25:41

¹²^kTa tomwawasa maibo'adi ya'itedi, sinabwadi be gidalidi, 'ebemi esaesa nina matanaya sitootoolo, ta buki 'ineyasidi, ga 'ebweu wate buki 'ineyasina, tauna yawasida bukina, ga tomwawasao 'iloinedi, to'ase nadigega 'idi bubuna 'eto'etoladina buki nidi 'ediya 'imiyami.

¹³^lTaudi ni'u 'adi to'enoyao simai, be tomwawasa yaluyaluwadi 'idi 'asa 'ana tomiyanao, be bale'u 'ana tomwawasao, maibo'adi simai, ga 'ebweuna 'ebweuna 'iloinedi, to'ase 'idi bubuna nadigega. ¹⁴^m'Enega Mwawasa be wate 'idi sena nina 'iula mwa'utedi yaiyai sinabwana solanaya, ta yaiyai nina nate mwawasa 'eluwena.

¹⁵ⁿTa 'abo yaisigedi nigeya 'adi esanao 'ilobaloba yawasida bukina 'enaya 'iuledi yaiyai nina sinabwana 'enaya.

Galewa auwauna be bale'u auwauna

21 ¹^o'Enega galewa be bale'u auwaudi ya'itedi siapwesa, ta nigeya ola, ta esi gimigalewa be gimibale'u ni'atu sikwaiya.

²^pGa 'asa 'esasena ya'itenia, tauna Yelusalema auwauna, galewega 'imwa'umwa'utama Yaubada 'enega, ni'atu 'ieiyalina nadigega toai mewainena 'iiyala be mamwanena sida elobaloba.

³Ga 'ebemi esaesa 'enega 'enana sinabwana yanonona, 'igwae, "U'ita, Yaubada be 'ina tomota ma'enoa sida miyami, manuna tauna ma'edi, be taudi 'ina tomotaiyao. Ona'ai'aila Yaubada ma'edi, ⁴^qbe mataseludi 'ida lo'i'ilidi, manuna geya'abo wate mwawasa nai 'elouya nai dedoi 'ediya 'iapweapwesa, manuna miya kadekadelina ni'atu 'igumwala.

⁵'Enega 'ebemi esaesa 'ana tomiya nina 'igwae, "Yage yaudi yada gieauwaudi", ga wate 'igwae, "Ona getedi 'ul'etoladidi, manuna ona 'ai'aila ta palupaluna."

⁶Ta wate 'ieonegu 'igwae, "Ni'atu! 'Abo'agu tuga 'ebe e'ale be 'ebe losalowa, ta 'abo yaisigedi taudi ton'a'adi siyapassa bwasi bobo'ana yada 'ebwaya daisidi yawasidi manuna. ⁷^sTa 'abo yaita 'iewaiwai Seitani 'ena, 'ebe gwausowala yada tagwala 'enaya be 'ida 'awatamanegu, be tauna yada 'awanatune. ⁸Ta esi taudi 'ate nenetadi be taudi nigeya siemiemisa be tosogalao be toloemwawasao be toloyaweyao be Taumudumudulele magosenao be gulewa 'adi toemisao, be toekabokaboyao, taudi getedi 'idi sena yaiyai sinabwana, nate mwawasa 'eluwena."

Yelusalema nina auwauna

⁹^t'Enega anilose nidi sebeni lowa 'elouya keigadi sebeni 'adi to'aalao 'ebweuna 'ediyega 'imai, ga 'ieonegu, 'igwae, "Umai be Lami mwanena yae'itayo."

^k 20:12 Et 20:5, 13:8; 2 Ko 5:10; Gu 17:31 ^l 20:13 Lo 2:6; Et 22:12

^m 20:14 1 Ko 15:24-26, 54-55 ⁿ 20:15 Md 25:41 ^o 21:1 2 Pi 3:13 ^p 21:2 Ib 11:16;

Et 3:12 ^q 21:4 Et 7:17; 1 Ko 15:24-26 ^r 21:6 Et 1:8, 22:13, 17; Ais 55:1; Yo 7:37

^s 21:7 Lo 8:14-17 ^t 21:9-10 Et 15:1, 21:2; Ep 5:27

¹⁰Ta Yaluyaluwa Tabuna 'i'au'ewegu 'oya kesolana debanaya ga 'asa 'esasena 'ie'itegu, 'ana esana Yelusalema, galewega 'imwa'umwa'utama Yaubada 'enega. ¹¹Ta Yaubada 'ina esaesa maedanina 'asa nina 'enaya 'isaesae, ta 'asa nina tuyayalina, 'atuwa nadigega gulewa esaesa, ta 'inamanamala 'atuwa gelasi.

¹²Ta 'asa nina 'ana 'ali sinabwana ta kesolana, ta 'ana 'awa 'adi yau tuwelo, ta 'awa nidi 'adi to'ita'i'ita anilose tuwelo, ta wate 'awa nina 'ediya susu tuwelo nidi Isileli 'enega 'adi esanao si'etoladidi. ¹³'Ali nina 'ana weyalao ata. 'Ebweu sena bolimana 'enega, ta 'ana 'awa 'etoi, sena yaalata wate 'enega 'awa 'etoi, sena yalasiyega wate 'awa 'etoi, be sena 'ebwagega 'awa 'etoi. ¹⁴'Asa nina sinabwana si'abina 'autui 'ebweu bobo'ana 'enaya, nate gulewa tuwelo pa'alidi debadiya, ga gulewa nidi 'ediya Lami 'ana tosimanao tuwelo 'adi esanao si'etoladidi.

¹⁵Ta anilose nina ma'iyagu 'aonaona, nimanaya 'ebe 'etopwapwa goula, be 'enega 'asa nina namanamalina be 'ana 'awao be 'ana 'ali wate 'ida 'etopwapwadi. ¹⁶'Asa nina 'ana dudula be 'ana bababa sena ata nidi leleleya. 'Enega anilose nina 'ina 'ebe 'etopwapwa 'enega 'asa nina 'i'etopwapwena, ga 'ana dudula be 'ana bababa be 'ana kesola maibo'ana leleleya, nadigega pipitini analedi kilomita. ¹⁷Ta 'ali 'ana bado nimanega 'i'etopwapwena ga 'ilobena teti sikisi lowa, nate wani analedi be potipowa kubiti. Anilose nina nimana 'atuwa tai nimana 'ana dudula nadigega.

¹⁸'Asa nina 'ana 'ali gulewa esaesa ta namanamalidi 'ediyega si'abina, ta 'asa solanaya goula 'enega si'abina, ta 'inamanamala 'atuwa gelasi. ¹⁹'Asa nina 'ana 'autui gulewanao, gulewa esaesa ta namanamalidi 'ediyega sieiyalina, ²⁰'autui nugana 'ana iyala 'ebweu gulewa esaesa wakewakekena, 'eluwena 'ana iyala gulewa 'ana 'ita ni'u gaigai nadigega, 'etonina kalakalawina, eatana bwewayabweyalina, enimana yomwayomwalina, bulabulana ta gaigaina, esikisina wate bwewayabweyalina, esebechina laulauna, ta e'eitana kalakalawina, enaenina wate laulauna, esanauna kalakalawina, elebenina wate ni'u gaigai nadigega, ta etuwelona gaigaina, ginausa nadigega. ²¹Ta 'asa nina 'ana 'awao tuwelo nidi paku sinabwadi tuwelo 'ediyega siguinuwedi, ga 'awa 'ebweuna paku 'ebweuna 'enega siguinuwena. Ta 'asa nina 'ana 'eda maibo'ana goula daisinamo, 'inamanamala 'atuwa gelasi.

²²'Asa nina 'enaya nigeya Anuwa Tabu ya'ita'ita, manuna 'Inapwana Yaubada Toewaiwai sana be Lami taudi Anuwa Tabu nidi tuga.

²³"Sinala be nawalae nigeya sida sae 'asa nina 'enaya, manuna Yaubada 'ina esaesaega 'ituyayalina maibo'ana, ta wate Lami 'iemayale 'asa nina 'enaya. ²⁴Ta maedana nina 'enega me bale'u sida lopilidadana,

^u 21:23 Ais 60:19-20; Et 22:5

be bale'u 'ana kiniyao 'adi tupu sida me'e 'asa nina 'enaya. ²⁵Ta 'asa nina 'ana 'awao 'asiyataya nigeya sida gibodedi, manuna nigeya guguyoi nai boiboi.

²⁶Ta 'ebeloinao maibo'adi 'idi 'amayaba be 'idi lotuputupu sida me'edi 'asa nina solanaya. ²⁷^wTa geya'abo sa'i yage baibailidi 'asa nina 'ena silugulugu, nai toguinuwa to'umalidi, nai toekabokaboyao. Nate namo taudi ni'atu 'adi esanao si'etoladidi Lami nina 'ina buki, nate yawasida bukina, 'enaya.

22 ¹^wTa 'enege anilose nina yawasida bwasina 'ie'itegu, bwasi nina matakadala 'ai'ailina, Yaubada be Lami 'idi 'ebemi esaesa 'enege 'idaudauma, ²ga 'asa nina gamwagamwaninega 'idaudolo. Ta bwasi nina tupitupina 'ediya yawasida kaiwenao sitootoolo. Kaiwe nidi uwadi nawalae 'ebweuna 'ebweuna dumadumadi be dumadumadi, 'enege yakwala 'ebweuna matuwelo siuwauwa, be yawanao boda maibo'adi bale'uya 'idi mulamula.

³^xTa esi yage gadilulu sida sawala 'asa nina 'enege, be Yaubada ta Lami nina 'idi 'ebemi esaesa 'ena sida miyami, be Lami nina 'ina topaisewao 'enaya sida guinuwa. ⁴^yBe wate maninina sida 'ita, ta tauna 'ana esana debadiya.

⁵^zGeya'abo wate boiboi, ta geya nuwadi sinala be mayale maedanidi, manuna 'Inapwana Yaubada tauna tuga 'idi maedana nina, ta sida loina ataya.

Yesu 'ina mai

⁶'Enega anilose nina 'ieonegu, 'igwae, "Ona getedi ona 'ai'aila ta palupaluna, manuna 'Inapwana Yaubada tauna yaluyaluwana 'ana to'ebwaya palopitao 'ediya, ga 'ina anilose 'ietunena be 'ina toguinuwao 'ediya 'ida e'ita to'ase 'iabe 'iapwesama manuna."

⁷^aTa Yesu 'igwae, "Wa'ita! Ni'atu gete be yawawa, be taudi onaupaupao buki gete 'ena 'adi toematamatanao sida gwausowala."

⁸'Abo'agu Yoni yage getedi maibo'adi yanonodi, ta ya'itedi. Ta yage getedi sigumwalaya ga anilose nina 'aenaya yabe'u sanamwa'uta, tauna yage nidi 'ana toe'ita 'eguya, ga 'ena yabwagobwago.

⁹'Enega tauna 'ieonegu, 'igwae, "Geya'abo nadigega, manuna 'abo'agu toguinuwa tuga nadigega 'oyo, ta tasidao taudi palopitao, ta wate taudi buki gete 'ana toematamatanao. Ta Yaubada esi 'ena 'uda bwagobwago."

¹⁰Ta wate 'ieonegu, 'igwae, "Geya'abo onaupaupa nidi buki gete solanaya 'ukwaikwaiyedi, manuna ni'atu tuta 'ilosabena, ¹¹be 'enege taudi toto'umalidi tuwa to'umalina 'ediya 'ida miyaataya, ta 'abo taudi 'idi bubuna baibailidi

^v 21:27 1 Ko 6:9-10; Et 3:5, 13:8 ^w 22:1-2 Nug 2:9 ^x 22:3 Et 7:15 ^y 22:4 Md 5:8; Et 14:1

^z 22:5 Et 21:23, 25 ^a 22:7 Et 1:3

tuwa baila 'ediyia 'ida miyaataya, ta 'abo taudi sibubuna bobo'ana 'idi bubuna 'ida bobo'ana ataya, ta taudi 'esasedi 'esasa nina 'ena sida miyaataya.

^{12^b}'Enega Yesu 'igwae, "Ilabe yawawa, be 'ami pali yame'edi be yada eguyai 'emiya, nadigega 'imi paisewa 'adi sinabwa, ^{13^c}manuna 'abo'agu 'ebe nugana ta 'ebe muliya, nai 'ebe e'ale ta 'ebe losalowa." ^{14^d}Ta wada gwausowala 'abo yaisigedi 'omi 'ami 'oama wagie'esasedi, manuna yawasi kaiwena uwana wa'a'ani, be wate 'asa nina 'ana 'awao 'ediyega walulugu. ^{15^e}Ta 'asa nina 'atamaninaya 'adi tomiyanao, nate kedewao, be Taumudumudulele magosenao, be toloelatao, be toloemwawasao, be gulewa 'adi toemisao, be wate toekabokaboyao. ^{16^f}"Abo'agu Yesu, ta 'igu anilose ni'atu yaetunenawa 'emiya, be yage getedi 'ida simanedi toekalesiyao 'emiya. 'Abo'agu Debida 'ina susuyega, ta 'abo'agu wate 'ubwana nina tuyayaligu."

^{17^g}'Enega Yaluyaluwa Tabuna ta toai mewainena sigwae, "Wamai." Be yaisigedi 'omi ona gete wanononaya, 'omi wate wada gwae, "Wamai." Ta taudi ton'a'adi 'iyapasa sida mai, be 'enega yaisigedi taudi nuwanuwadi, yawasi bwasina sida 'ewadaisi be sinunuma. Nigeya 'ana maisamo.

'Ebe losalowa

^{18^h}'Omi buki gete 'ina onaupaupa 'ana toenonoyao gete 'ami emataluwa, 'aene geya'abo 'imi onega waloeloeposeyane, 'abona nai 'elouyao nidi buki gete solanaya 'isimanediya Yaubada 'ida loeposeyane 'emiya. ^{19ⁱ}Ta wate geya'abo 'ebweu ona buki gete 'enega wa'ewa'ewa yaule, 'abona nai Yaubada wate 'ami egueguyai yawasi kaiwena 'enega 'ida 'ewayaule, ta wate 'imi 'ebemiya 'asa nina 'esasena solanaya, be yage yaudi bobo'adi buki gete 'ena 'isimanediya, 'emiye 'l'ewa yauledi.

^{20^j}Ona gete 'ana tosimana 'igwae, "Tamo! Gete be yawawa."

"Nadigega 'inapwana, 'uda ma, 'oyo Yesu."

²¹'Ida 'Inapwana nina Yesu 'ina nuwa'ole'ole, be 'ina oboboma, yauyaumi 'ana toemisao 'emiya.

^b 22:12 2 Ko 5:10 ^c 22:13 Et 1:8, 21:6 ^d 22:14 Et 22:1-2 ^e 22:15 Et 21:27

^f 22:16 Lo 1:3-4; Et 1:1 ^g 22:17 Et 21:6; Ais 55:1 ^h 22:18 2 Loi 4:2; Et 15:1

ⁱ 22:19 Et 22:2 ^j 22:20 Et 3:11; 1 Ko 16:22

